

三山禪師語錄

十一之十六

C40
4514
(260)

紫竹林顓愚和尚語錄
卷一
之五

紫竹林顓愚和尚語錄
卷一
之五

C40-4514

居士座請大藏及有
我徵我師院府中未
為學者不敢計出院內
當出世鐵十雜謹誌



B 64853

方融靈禪師住天界語錄

衆護法宰官請啓

伏以秋月空懸光捲夜明簾不借涼颺桂發香飄無
鬢樹重榮况燈王之餘燄交輝而善世之高門直立
諸山俟響四衆瞻風恭惟方公大師毓秀終南分竹
林之悲花戒月鍾奇澆水得天界之妙用神機把斷
要津潛行密行昔領雲居十禪煥然堂構維新近住
匡阜千峯渺矣煙霞增色忘機鹿艸息影鷄紋爲杖
人後事遠來值嘯公高踪繼往且棲霞及同門各錫
飛一地此席豈應久虛成迺等於斯時共函啓片詞



撰述
大法期將遠振吉占望日時屆仲秋座拂寶華聽雨
花堂中露滴銀河之古翠爐燒沉水看毘盧閣上雲
盤碧漢之新蒼還先師之公案現成斬末世之葛藤
亂統朝陽再鳴於鳳嶺興雲復睹於龍河臨楮緘三
和香合十不勝忻躍翹企之至佛弟子周天成鄧旭
吳弘安劉餘謨黃國琦陸朗李臯方若珽王言劉餘
璉李文芳劉思敬危列宿陳世昌劉思問楊昌齡周
士章孟瑄王端朱之鼎姜鼎沈豹陳丹衷同頓首拜
衆護法孝廉文學請啓

伏以一燈發燄燈燈相續無窮萬法同宗法法皆歸

實際模範流芳於今日師資直接於當時恭惟方翁
大師皎月臨淵清風拂水得少室不傳之旨分曹溪
無盡之流瞬目揚眉已事全彰世外拈椎豎拂大機
適露當陽丁羣情欲撼之秋藉中流而砥柱際一綫
將危之候挽末法於狂瀾潢等久已心皈無繇身近
茲以天界因緣之合彌切人寢扳仰之忱松竹青蒼
曲逕逶迤拄杖橫拈霄漢上雨烟朝暮半峰縹緲門
庭直設畫圖間吟詠不減季潭泐翁拈提豈讓雪軒
成老子承父業頭正尾端使末後光明炤天炤地施
斬新條令打雨打風隨高步以周旋幾多龍象結勝

撰述
因而廣遠如許香花餅錫儼臨人天交悅法弟王潢
汪觀白夢籛吳儀濤陸本胡禹冀王作礪陳宿姚世
昌胡長庚王箴顧夢游錢滙楊國士應駟白夢鼎盧
贇紀映鍾茶懷黃棠芳張忽楊泰詹淇陶敬宋喟歐
陽坤歐陽壻歐陽峻陳廷彛黃嘉善倪震倪霽凌翰
凌文俞籛年張雲蓀張雲路張雲蔚阮檉成必遠黃
維嵩韓豫卞期發董純翼同頓首拜
諸寺方丈暨衆者宿請啓

伏以祖印全提塗毒聲傳盼外法幢高豎栴檀香遍
寰中向上機本無言而無示衆生願滿若見而若聞

遐邇風趨人天景仰恭惟方翁大師挺生關內傑出
涇陽標格外之玄機金針密度拔羣迷之顛倒玉鎖
重開獅子頻呻衆獸自當息喙象王蹴踏野狐莫不
潛踪面命耳提矜巾瓶之飛詣風行草偃望法席之
生輝今此名山夙稱禪窟盡是吾家種艸未嘗別立
門庭拾博山爐內之鉗鎚入室頻來雲水飽杖者鉢
中之餘粒送供况有龍天顧以後生久坐其荒蕪時
當末法茲焉宗旨再從昭揭運值重興琢煉松頭祈
指雲巖之路拈提月下可參寶鏡之光叶兼帶於正
偏君臣位合該全攝於玄要賓主權分勿拘謙讓之

懷得遂鄙私之請惠然至止曷勝欣忭臨楮無任顛
仰之至教下弟覺爨普行明達宗教妙光通旨性廣
慧廣淨弘道合弘清大廣慶習宗鏡照識成彬普悅
本坎寂恬常進大振同頓首拜

監院請啓

伏以靈孕太華具一隻之正眼別傳大好昭百代之
真宗敬迓威儀渴思建立恭惟方翁和尚雲居發軔
天吟傳衣法雨霏霏自爾徧滋宇宙慈雲靄靄從來
曾被山林緣熟三吳遊經幾度十載與君把臂敢謂
同叅今朝爲衆安心請居師位顛倒風旛拈舊句融

通水乳引新機

輪

乃庸流實如敝帚輔先人一十八

稔慙無寸尺之功監破院今已九年愧乏振興之力
俱漆桶之底難脫不肯承當學願王之行方深祗知
精進因集法護更申誓言敗壁頽垣必望鼎新異日
攢花簇錦自當媲美先朝齒德俱尊宜鑪錘於此地
壘篋迭奏開聾瞽於四方所冀裕後光前乃慰深情
遠慮赴衆籲如大士赴海潮之音援羣頑如世尊援
最小之弟立見截狐種族恒觀踏佛頂顛俯竭葵忱
仰于蓮座謹啓監院大輪頓首和南

一撰述
小佛事

行脚垂語

佛祖贊

歌

偈

行實

附淨土詩

方融璽禪師語錄卷第一

門人興林等編

住金陵天界禪寺語錄

順治庚子八月十九日師於紫竹林受闔郡縉紳孝廉文學居士同諸山方丈耆宿監院等請住天界寺於九月十五日入院

山門盡大地是箇善世法門都虛向甚麼處入驀卓拄杖云看脚下

觀音殿慈悲爲人有理圓通自在無礙三十二應現身隨類改頭換面且道卽今在甚麼處咄

彌勒殿拄杖煞活古今布袋收放天地是法本來平等一任逢場作戲

大佛殿巍巍堂堂諸法中王明明歷歷出現於世十字街頭吼鐵牛孤峰頂上轟霹靂便禮拜

祖師殿祖師眼睛衲僧巴鼻厮抑厮揚拋來擲去有甚麼了日震聲一喝

據室據此室行此令肘後懸神符人來乞性命更有一則公案甚是誦訛驀豎拂子云甞

上堂維那宣疏竟師指法座云這座虛架高臺亦是瓊樓寶閣亦是劔樹刀山若非罪福兩忘底誰敢挨

着挨着則利害隨身山僧今日要登便登要坐便坐因甚得恁麼百無禁忌喝一喝便陞拈香云此一瓣香乾坤正氣日月真光熱向爐中端爲祝延今

上皇帝聖躬萬歲播堯風於大地布舜澤於蒼生此一瓣香爲國爲家者未嘗不本此盡忠盡孝者全承這恩力熱向爐中奉爲滿朝文武闔郡宰官孝廉文學居士等人人廣作佛事箇箇普利群生此一瓣香踏遍諸方玄路叅詢直究根源博山會裏從空透露天界室中徹底掀翻藏身歐峰雲居遯跡匡廬巖壑自謂於世絕聞豈料年深月久却被人知勉強出山

事不獲已今日恭對人天衆前熱向爐中端爲供養
天界堂上傳曹洞正宗三十三世本師覺浪和尚用
酌法乳之恩乃歛衣就座松影和尚白椎竟師豎拂
子云會麼道家風隱顯叵測有時向孤峰頂上盤
結草庵任他春夏秋冬自繇自在有時向十字街頭
撒開布袋隨我東西南北獨行獨步高下皆得其宜
今日却在天界寺裏受衆人請繼先師席掀翻洞水
逆流唱出好山別調普利人天不拘軌則法堂前千
衆圍繞也如是法堂前草深一丈也如是我爲法王
於法自在更有何事雖然祇如法幢初豎條令重新

當陽一句作麼生道橫按鑊鉞全正令太平震宇斬
癡頑舉古德爲人卽不出出卽不爲人話師云大似
一條拄杖二人扶雖然互相建立未免各見一邊祇
如天界今日上堂說法還是出耶不出耶爲人耶不
爲人耶具眼底試道看衆無語師擊拂子便下座
禮東苑祖像東苑師翁面目奇如何想像畫成伊人
皆瞻仰捺天鼻獨自稱尊挂劍眉雖然莫道鬚鬚赤
更有赤鬚鬚

禮天界先老人像水出石泉徹骨冷風過林花噴鼻
香一度經懷一度噎半是賞心半斷腸向爲孤峰絕

侶寒煖自知雲漢獨尊恩冤莫報今旣風生平地水
到通渠龍象蹴蹋而來車馬奔忙而至奈何一身入
鬧市相逢八面盡鋒鋦逼拶得拄杖子覲體生光總
只爲你四十餘年賣不了底鹽醬

禮傘居和尚像窮盡生平冷熱腸殷勤一戒未能忘
知恩莫大應難報振起圓通古佛光所謂因風吹火
用力不多借渠鼻孔與渠出氣聞思悟入三摩地戒
定薰成五分香

當晚小叅璽長老一向高高山頂着脚深深海底垂
手逢龍折角遇虎捋鬚猶未是拄杖子遊戲長處不
意到來鬧市街頭平穩地上却被人左逼右拶驅入
善世法門又作麼生激揚重重波浪重重月疊疊峰
巒疊疊雲

落堂今日落堂無法可說拈則公案一齊勘過喚作
祖師意無繩自縛不喚祖師意當面錯過總不與麼
則終日河頭擔水賣歸家猶叫口乾渴

鵬月八日上堂僧問世尊今日成道拄杖今日化龍
且道是同是別師云惟此一事實進云未覩明星時
如何師云左眼半筋進云已覩明星時如何師云右
眼八兩進云初曰天上天下惟吾獨尊後道一切衆

生俱有如來智慧德相還是自語相違理合如是師
云總與一頓棒乃云釋迦佛成道拄杖子化龍惟此
一事實好日多犯重祇今諸上善人聚會天界炊鐵
釘飯烹木札羹是爲釋迦佛成道耶拄杖子化龍耶
現前諸人試出道看道得着也與三十棒道不着也
與三十棒何爲如此不見世尊一觀明星極口歎曰
奇哉奇哉一切衆生俱有如來智慧德相但以妄想
執著不能得證拄杖子旣與佛同時成化當與佛共
鼻出氣大衆會麼遠離妄想及諸取令心所向皆無
礙

結制侍御陳旻昭居士給諫劉良弼居士同熊春臺
衆居士設供請上堂僧問花笑鳥啼風和日暖春將
半鳴鐘擊鼓結制陞堂午正中十五前後卽不問正
當今日事如何師云花朝且喜值天晴進云祇如九
旬禁足又作麼生相爲師云若干鼻孔一杖穿僧左
右顧云大衆好看婆心徹困處試聽風前鐵笛吹師
云誰是知音僧禮拜云謝師答話師云好箇師僧又
恁麼去乃云天界今春結制龍象如雲普聚若要大
家明心須當各自努力古人道向上一路千聖不傳
學者勞形似猿捕影天界長老特爲今世門頭人舉

揚威音那畔事若干鼻孔一杖穿脚下痛與棒三十
總要皮裏有血底透玄機於劫外絕意路於今時獨
露本具風光各得真實受用不更持金作丐把火覓
燈窮露他方賃屋住不知誰是主人公

薦亡上堂僧問萬戶春風信手拈和盤托獻法王前
杖頭活句機先眼點出龍睛耀碧天龍睛卽不問如
何是機先眼師云一雨普潤進云恁麼則均霑法利
去也師云你本分事如何進云學人禮拜和尚師云
也須照顧鼻孔僧問無佛處不得住時如何師云頭
角參天進云有佛處急走過時如何師云脚跟點地

進云今日居士設供請和尚說法薦亡未審向甚麼
處去師云天上天下進云憑師一滴曹溪水散作皇
都徧地香師云閒言語乃卓杖云大好消息今日是
岐瑞居士設供爲薦亡叔明暘朱公請山僧舉揚般
若普利存亡存亡且置般若作麼生舉昔僧問古宿
動容揚古路不墮悄然機且道那箇有分那箇無分
宿云有功者賞古人恁麼答話只知杖頭點額不解
拂尾垂鈎如今有人問山僧動容揚古路不墮悄然
機那箇有分那箇無分劈脊便打且道意在甚麼處
復卓拄杖下座

爲衆職事上堂僧問教中道是法平等無有高下爲甚萬仞峰頭底人却在千尋海底相遇千尋海底人却向萬仞峰頭相逢師云是法平等無有高下進云恁麼則處處逢場作戲人人拄杖撩天師云你將甚麼作拄杖僧一喝師云喝與拄杖有甚交涉僧擬議師便打進云今日和尚爲衆說法未審兩序有分別也無師云棒棒打著進云是賞是罰師云分明記取進云恁麼則依教奉行去也師云汝作麼生行進云但有益無不興崇師豎拂子云你興崇得這箇麼僧便拜師云之乎者也乃云浩浩乾坤煌煌日月

恢恢世界堂堂丈夫豈肯向虛空裏打觔斗縱能打出虛空之外更有虛空可打終不免落地一着且如何是落地一着卓杖云看脚下舉僧問睦州和尚如何是展演之言州云量才補職僧云如何是不展演之言州云伏惟尚饗徑山云睦州古佛善應來機雖然如是祇得八成或有人問徑山如何是展演之言便向他道問十答百有甚麼難如何是不展演之言喝一喝云且莫作屎窖沸師云徑山老漢答話雖俏其奈賣弄特過或有人問天界如何是展演之言便道法筵龍象衆當觀第一義如何是不展演之言便

道諦觀法王法法王法如是大衆且如睦州道底被
徑山檢點徑山道底被天界檢點天界道底莫有人
檢點得麼長鯨一吸海水盡森森露出珊瑚枝
居士祝髮請上堂僧問古人剃草爲剃髮目今盡大
地都是草先從那裏剃起師云從頭剃起進云頭在
何處師豎起拂子進云尾在何處師擲下拂子進云
恁麼則頭尾一如處乞師親剃落師將拂子一拂僧
禮拜師云正直捨方便乃云帶髮呼爲俗披緇喚作
僧穿衣戴帽雖有異箇中無二主人公旣知這些消
息須當善自護持若要發揚此事不出尋常日用行

住坐卧南北東西糞草堆頭教化泥水地上接引放
開憨布袋笑殺傍觀逢人乞箇錢拈弄當面雖然佛
事多端要先從頭做起唵悉殿都漫多羅因緣成就
眞實不虛入此法門安肯空過昔牛頭未見四祖時
感百鳥啣花諸天送供及見四祖後肩挑一石背負
八斗運米供衆日無虛度若不秉持僧行苦將何報
答佛深恩

久雨乍晴上堂僧問久雨不晴時如何師云箇箇拖
泥帶水進云今日忽晴時如何師云人人去傘脫屐
進云將晴未晴時如何師云轉見自倒自起進云爲

甚如此師云石頭路滑乃云天上興雲地下落雨紙
傘木屐拖泥帶水誌公杖頭挂剪刀趙老青州做布
衫若作世諦理論太俗生若作佛法商量太僧生若
只籠侗打之遶爭知二老之裁置已往事且放過只
如今朝長空無點雲孤輪絕對待正當恁麼時又作
麼生盤錯光影門頭着語易晴明日下隱身難
上堂僧問搥鼓陞堂卽不問和尚未出方丈一句作
麼生道師云大納輒坤濶進云恁麼則當陽一句絕
中邊師云你向甚麼處見老僧進云兩眼對兩眼師
云却被老僧看破進云不辜親見和尚師云孟浪禪

和僧問賓主五位卽不問三玄三要意如何師云向
源頭上薦取進云如何是第一玄師云露柱笑哈哈
進云如何是第二玄師云塔下石生臺進云如何是
第三玄師云齋堂佛殿前進云如何是第一要師云
古路無人到進云如何是第二要師云撥開沒孔竅
進云如何是第三要師云拄杖分明道進云玄要蒙
師親指示向上一路復如何師云赤腳踏青天乃驀
豎拂子云機緣問答且置會得這箇麼如未爲諸人
下箇註脚惟一堅密身一切塵中現無性亦無相周
徧於法界雖然過去諸佛未乎迦葉善逝未來諸佛

先乎彌勒導師現在諸佛當乎釋迦世尊且喜今日
普集天界平等光中各出廣長舌相徧覆大千世界
異口同聲道汝等諸人行住坐卧莫離這箇若離這
箇當面錯過錯過不錯過且置喚甚麼是這箇擲下
拂子云不離當處常湛然竟卽知君不可見

道婆請上堂僧問高懸八卦圖坐斷諸方路請師直
指箇中意師云嶺南消息若何僧一喝師云莫亂弄
僧無語師便打僧轉身出師云野狐禪逞甚伎倆僧
問呆日當空無處不照爲甚這邊有那邊無師云循
業發現進云學人則不然師云你又作麼生僧擬議

師便打僧禮拜師云磕破骷髏當得麼乃云是覺非
覺卽念離念有心無心若惡若善一串穿來諸人算
看算時若不識數盡是籠侗真如漢祖師道出息不
涉衆緣入息不居陰界常轉如是經百千萬億遍萬
億遍且放下喚甚麼作如是經昔有婆子請趙州和
尚轉藏經州遶禪床一匝云轉藏竟婆云請和尚轉
全藏爲甚祇轉半藏全藏半藏且勿論未審轉底甚
麼經祇如今日道婆請山僧舉揚般若且道山僧舉
底與古人轉底還有分別也無良久云擇法要先具
正眼弄潮須是入洪波

上堂僧問狹路相逢時如何師云真對頭進云當面
錯過時如何師云不相識進云驀直撞着布袋時如
何師云與我一文錢進云這一文錢有何用處師云
換人眼睛進云還換得虛空麼師云得進云虛空作
麼生換師云北斗面南看進云果然於法自在師云
降者放過乃云貌古形疎氣宇豪閒來鬧市弄金毛
一聲震吼人皆畏走獸飛禽望影逃莫有向箭鋒下
出頭底麼良久云雨打泥塗壁

上堂僧問公案千差則且置如何是五家宗旨師將
拄杖一卓進云莫儻侗師云逞你伎倆來進云如何
是臨濟宗師豎起拄杖進云如何是曹洞宗師橫拈
拄杖進云如何是雲門宗師將拄杖左邊一劃進云
如何是滂仰宗師將拄杖右邊一劃進云如何是法
眼宗師將拄杖向空一劃進云恁麼則歸源無二路
方便有多門師云你離却拄杖喚甚麼是歸源路僧
豎一拳師云亦是方便門僧擬議師便打進云這等
機用須是天界始得師又打云一任舉似諸方乃云
這條拄杖盡大地誰不有一根只是他不解用遂成
死水裏龍與蝦蟇魚鱉互相鈍置他若解用陸地生
波沒殺天下頭角去在雖然也要拿捉得穩若拿捉

未穩終不免被人奪却大衆莫有奪得老僧拄杖底
麼良久遂下座拈棒打散

青原嘯峰和尚初忌上堂僧問五蘊性空涅槃路如
何是涅槃路師云坦進云恁麼則生滅旣滅寂滅爲
樂師云黯進云且道我青原和尚只今在甚麼處師
云險進云還是現宰官身現菩薩身師云普進云蒙
師指出金剛眼一道神光徹太虛師云點乃豎拂子
一喝云喝散陰雲旋佛日拂開泥水轉機輪大家都
在聲光裏何處區分疎與親所以道法不孤起偶事
方與茲值我嘯峰法兄初忌嗣子暨諸同門對龕設

供壘上座承現攀例舉揚個事以見法兄生平履歷
諸人要見我嘯峰和尚面目麼驀豎拂子云向這裏
着眼

解制司理三開楊居士設供請上堂僧問祖印高提
宗風永振向上機卽不問末後一句請師舉示師云
薦取目前底進云世尊拈花迦葉微笑且道是結是
解師云一併拈却進云正當今日解制時如何師云
脚下草漫漫進云若有箇銅頭鐵額漢來和尚與他
作麼生相見師云放汝三寸棒進云翠竹黃花新氣
象蒼松古栢舊風光師云不易念得好僧問古人道

主隨客便客聽主裁請問和尚如何是主中賓師云
當堂不正坐進云如何是賓中主師云立位無偏
進云如何是主中主師云此間無諸人進云如何是
賓中賓師云彼間無老僧進云賓主未分時如何相
見師云眼中童子面前人進云賓主五位蒙師指九
年面壁意如何師云毒風從此起禍事至今生進云
盡大地有不遭此害底麼師云且喜闍黎無分乃云
撞鐘擂鼓普請老僧上法堂接踵摩肩汝等諸人爲
何事雖然張口道不出是法平等舉手構不着無有
高下爲甚古人道三世諸佛不知有鷲奴白牯却知
有知與不知利害同源天界這裏二俱不取作麼生
是有底事莫是春日結夏日解拈拄杖豎拂子麼莫
是飢時飡渴時飲早念呪晚誦經麼莫是天上晴地
下乾迎賓來送客去麼如或不然說到理窮言盡處
不如藏舌與安心

誕日道映禪人同甘湛之錢仁甫衆居士設供請上
堂維那白椎竟師云卽此一義籠陷古今若是其人
自有出身活路大衆莫有向未舉前相見底麼僧問
時當盛暑杲日光騰和尚墜座大衆瞻仰全付金襴
卽不問慶賀一句願親聞師云重逢雙巧雨花朝進

云寶掌和尚壽千歲無位真人年多少師云今朝七月七進云如何是無量壽師云始末不墮進云今日親見和尚師云你將甚麼見老僧進云一毫瞞不得師云祇如瞞不得底是甚麼僧擬議師便打乃云大凡舉揚此事須俟時節因緣時節一至此事自彰不然但見雲從這裏起不知雨向那方來今日是衆居士設供慶賀山僧滿旬時節請陞此座舉揚箇事驀豎拂子云會麼巍巍堂堂明明歷歷無倚無依赤爪露地六十年來一念過返觀久遠如今日

上堂僧問世尊陞座良久默然意旨如何師云放汝

一頓棒進云文殊白椎世尊下座意復如何師云放汝一頓棒進云恁麼則世法平等無有高下師云放汝一頓棒良久云還有契棒底麼僧纔出師云放汝一頓棒僧禮拜云莫勞和尚尊力師云放汝一頓棒乃云山僧不解說道理臨衆惟憑拄杖打是法平等無下高那分佛牛與祖馬龍濟道具足凡夫法凡夫不知具足聖人法聖人不會聖人若會卽同凡夫凡夫若知卽是聖人聖人知會且拈放一邊喚甚麼是具足法放汝一頓棒

上堂良久云到此地位一場好笑老僧未陞此座時

記得許多佛法與諸人說既陞此座總忘却了若道
記得底是忘却底則非若道忘却底是記得底則非
鷲豎拂子云看取拂子一肩擔荷何爲如此不見道
來說是非者便是是非人擲拂子下座
結制上堂僧問好箇第一義被學人一椎祇得七花
八裂未審現前緇素向甚麼處觀師云緇素且置你
向何處着眼進云掬水月在手弄花香滿衣師云再
看後語僧拂坐具歸位師云熟套子僧問世尊昔在
靈山會上教演三乘和尚今在天界堂中說甚法要
師云一字也無進云祇此集衆陞堂又作甚麼師云

龜毛索子縛虛空進云恁麼則目前無法意在目前
師云莫錯認僧問天共白雲曉水和明月流因甚要
三月安居九旬禁足師云無孔鐵鎚當面擲進云或
有箇掀倒禪床喝散大衆底又作麼生師云祇恐不
是玉是玉也大奇進云畢竟如何辨的師云點僧拂
袖歸位師云令僧問法王陞座選佛場開賓主相逢
如何話會師便打僧便喝師又打僧禮拜師云相見
事如何僧擬議師云空點下場頭僧問真卽是幻幻
卽是真真幻旣除道歸何處師云虛空翻筋斗進云
師意如何師云知汝脚跟没落處乃云天界開爐時

節至舊規整頓從新立現成法則好安排料想工夫
不費力若據古人結冬三千世界作爐百億須彌爲
炭生鐵鑄就禪和炙得通身紅爛雖然大人做事不
小未免過費工力天界今日結冬不執古入定軌量
堂安衆隨意開爐撥動一星火種總要九旬同居擬
心覷向金剛燄灼破當人鐵面皮昔僧問洞山和尚
寒暑到來如何迴避山云何不向無寒暑處去僧云
如何是無寒暑處山云寒時寒煞鬧黎熱時熱煞鬧
黎一賓一主一問一答且道在寒暑裏垂手耶在寒
暑外着脚耶檢點得出許你親見洞山不然寒煞熱
煞莫怪老僧不相爲好

上堂今日上堂半陰半晴依稀雲黑彷彿日紅行底
擬住住底擬行不行不住擬在途中泥牛入海無消
息木馬追風不見踪

冬至上堂僧問昨夜堂中古佛惡發便道今日與和
尚法戰一場未審將何抵敵師云霜劍挂寒空進云
祇如不展鋒鏑如何得勝師云一默語如雷進云恁
麼則掩耳有分師云惹禍自殃身僧拂袖歸位師云
轉見郎當僧問今日施主請師陞座未審將何法酬
答師云總教喫茶去進云或有箇非凡非聖底又如

何接待師云拄杖子飽與一頓僧問如何是諸佛世界師云清淨本然進云如何是衆生世界師云山河大地進云恁麼則一念有差聖凡懸隔師云祇汝一念無差未是了事乃云佛界衆生界菩提及煩惱法非聖與凡事在了不了佛是衆生界中了事漢衆生是佛界中不了事漢了事底如月不了事底似星羣星萬點不若孤月一輪衆生無數惟佛獨尊在天而有天尊佛乃天尊之尊在人而有人尊佛乃人尊之尊在聖而有聖尊佛乃聖尊之尊若在山僧無有高下何爲如此這裏本無凡聖見有何道理落商量

上堂今日上堂傾盆雨雪冷落門庭無法可說縮項長噓憶古人滿床盡灑梅花屑

解制上堂一事圓成百日期放開布袋任東西果然得箇出身路不負從前挂劒眉所以道未有常行而不住未有常住而不行祇如行住分明合作麼生安置孟春猶寒恭惟諸人珍重

上堂脫去住山破衲襖却來應世着金襴添新換舊意非別盡是當年業使然目今拄杖拂子搖頭擺尾似鳳如龍獍俊海天縱橫無礙復是何感報普請諸人看看

住金陵弘濟禪寺語錄

康熙壬寅九月十八日師於天界受紳衿文學居士
諸山耆宿等請住弘濟寺於十月初三日入院

佛殿一尊古佛殿三間半在江邊半在山今被老僧
齊坐却弘揚自有衆多般雖然如是也須大展三拜
據室衲僧家風無定行事一任牛欄馬廐虎穴龍宮
拄杖到處自我作主况集衆叢林選佛場地諸人還
會麼若未禮拜了退

上堂拈香祝

聖畢復拈香云此一瓣香天界曾燒弘濟復熱總爲
先師浪老和尚用酬法乳之恩乃歛衣就座上首白
惟竟師良久顧左右云會麼昨出善世法門今入弘
濟禪寺一條拄杖隨身兩處逢場作戲不見道彌勒
眞彌勒分身千百億處處示時人時人皆不識卽今
釋迦過去彌勒未來正令全提當軒者誰薦拈拄杖
云莫是這箇麼雖然法不孤起緣會方興茲承闔郡
檀越諸山耆宿恭請山僧隱靜於是禪道佛法一事
不爲但飢來喫飯倦到打眠諸人於此作麼生會昔
趙州住院凡見僧來便教喫茶去當年此老雖然意
出常情言無揀擇未免將這些子向飲食裏輕舉賤

用山僧則不然真金自有真金價終不和沙賣與人
結椎下座

當晚示衆大抵此事說到莫若行到行到底人自然
會說古謂但知心是佛何愁佛不解語又云行解相
應方堪出世爲人若只徒說而不行但能利人不能
利己若只默行而不說但能利己不能利人直饒說
得行得來弘濟門下正好喫棒且道山僧與諸人恁
麼道還是行耶是說耶具眼底試道看

結制上堂舉長沙上堂云我若一向舉揚宗乘法堂
前草深一丈如今諸方禪和子大都愛熱鬧嫌冷淡
忍耐不住混入野狐精隊莫能返省猶謂理之應爲
闡揚大法殊不知屈辱從上宗風也所以古尊宿教
人意在真參實悟不在知解言論實悟底人得意忘
言於逆順境上作得主宰生死關頭得其自由不見
裴相國問黃檗山中四五百人幾箇得和尚底法檗
云道在心悟豈在言說言說祇是化童蒙耳道畢竟
作麼生悟莫將聞學解理沒祖師心
冬至上堂冬至短夏至長春分暖秋分涼四時運物
如轉輪八節催人似箭忙祇有山僧拄杖子不屬造
化與陰陽飢飡渴飲傲雪凌霜一段真風空劫外不

離日用與尋常

七月十五日上堂今朝是中元嘉會自恣良辰諸佛歡喜衆聖雲集隨所住處隨機羯磨有過底悔過過悔而功著無過底加功功加而果證當知是日十方世界一切人天有作空花佛事水月道場底能除一切苦能獲一切福真實不虛弘濟家風則又不然月月是好日日是好日不見龐公道十方同聚會箇箇學無爲此是選佛場心空及第歸雖然如是口說無憑鶩豎拂子云看看喚作拂子卽是過不喚作拂子亦非功畢竟作麼生得二俱不墮去速道速道衆

皆默然師云果然沒孔錘錐割不入擲拂子下座上堂鼓白浪於萬仞峰頭揚紅塵於千尋井底三百六十骨節節盡皆建立八萬四千毛孔孔孔廣爲流通耳聰底聞眼明底見聲色歷然無刹不現鐵圍圍地解脫門八字打開成一片

上堂江上潮聲澎湃窻前樹影婆娑文殊吟風嘯月普賢逐浪隨波善才童子善知衆藝圓通大士自在圓通較量四聖所作未免各具一能且道山僧境界當復如何鶩拈拂子云隨流識得性無喜亦無憂毘盧佛裝金上堂師云毘盧遮那佛法界主中主隨

類現全身自我而作祖今朝弘濟拂子向無見頂上
坐斷三身於有情脚下廣行萬行雖然是法平等未
免猶有高低祇如盤旋珠走意轉機隨物我交參事
理互顯出真入俗帶水拖泥不避譏嫌何妨混跡花
街柳巷酒店屠房虎穴龍宮神壇鬼廟東扯西拽上
舉下提折攝雙行慈威並用或是或非人不識逆行
順行天莫測且道拂子具甚麼眼

受陝西寧夏鎮衆護法請上堂離鄉四十五經秋返
目流光一日完蹋徧諸方今世界還歸大國古長安
雖然如是不因罷戰馬難到太平鄉茲承衆護法各

發誠心共辦信具和盤托出恭請山僧且道受卽是
不受卽是弘濟堂前親切意長安路上廣流傳

小參

小參師豎拂子僧問和尚陞座大衆瞻依拂子未舉
時如何師云寰中天子敕進云已舉時如何師云塞
外將軍令進云已舉未舉時如何師云疑煞天下人
僧禮拜師云險乃云古人道有物先天地無形本寂
寥能爲萬象主不逐四時凋向這裏會得則知未有
三才二儀先有本命元辰主持造化產育蒼生凡處
同分世界底莫不均稟這段虛玄靈妙之真光經寒

暑而不變歷今古而常存智者知是佛性迷者喚作
精魂試看日用分明是佛性是精魂還辨得也未昔
瑞巖喚主人公惺惺着今後莫被人瞞良有以焉諸
方盡道瑞巖喚主人山僧却道主人喚瑞巖出乎爾
返乎爾用常妙體常虛體虛則非凡非聖非悟非迷
非生非滅寂寂焉呼之而內則不能無其聲用妙則
忽前忽後忽左忽右忽上忽下昭昭焉視之而外則
不能有其形到這裏無你推托處無你承當處良久
召衆云主人公惺惺着今後莫被人瞞奸
解夏小叅夏末秋初解制期崢嶸頭角遶丹墀盈腔

意氣冲牛斗無敢當機捋虎鬚莫是知法者可懼麼
莫是自得者不輕洩麼莫是默契者便休去麼如不
然便是背寫千張易對人一字難復舉世尊在靈山
會上拈花示衆惟迦葉破顏微笑遂將金襴伽黎正
法眼藏付囑流布毋令斷絕後來阿難問迦葉世尊
付金襴外別傳甚麼迦葉喚阿難難應諾迦葉曰倒
却門前刹竿着乃紹二祖位自此西天四七東土二
三直至如今且道還有優劣也無苦瓠連根苦甜瓜
徹蒂甜

立秋小叅一花發大地春一葉落天下秋得少以爲

足見角類金牛且如花未發葉未落知是甚麼時節
直饒擬向大熱大寒處去猶被寒熱時所使未必能
使寒熱時不見昔僧問趙州十二時中如何用心州
云汝被十二時辰使老僧使得十二時這箇道理甚
是分明祇今會得識心達本源故號爲沙門非但不
被此箇時辰使亦復使得此箇時非但使得此箇時
亦復同上古人使得十二時非但使得十二時亦復
使得三十日非但使得三十日亦復使得十二月非
但使得十二月亦復使得百千年非但使得百千年
亦復使得無數劫非但使得無數劫亦復能轉無數

劫乃至歸於此箇時非但能轉無數劫乃至歸於此
箇時亦復能轉此箇時歸於這一念非但能轉此箇
時歸於這一念亦復能將這一念當處出生隨處滅
盡若只使得轉不得爭見吾心能爲萬法主不逐三
世遷自在受用之妙邪雖然若論衲僧巴鼻又不在
此列

僧供法衣請小叅僧問昔日大庾嶺頭提不起如何
今朝在這裏師云是誰恁麼道進云承古有言師云
接響之流乃云須彌不挂寸絲虛空能容萬象有時
喚作福田有時呼爲心田施者受者且如何得相應

去展衣云三世諸佛出世咸披此衣說法度生歷代
祖師開堂亦披此衣說法利人天界今日既辦這棚
傀儡不免着此花彩與諸人看莫道古人用底今人
不取好

中秋晚叅普賢大士道諸供養中法供養最供養且
置喚甚麼是法拈起月餅云莫是這箇麼是則盃盤
狼籍脫或未然且看天上月水中月波蕩樣雲皎潔
形影雖懸殊光明相交涉一月普現一切水一切水
月一月攝若要入此境界須必到此時節非意解而
可擬議豈思惟之所分別昔僧問投子青和尚月未

圓時如何投云吞却三箇四箇僧云圓後如何投云
吐却七箇八箇三箇與四箇七箇與八箇吞吐甚分
明曾未咬得着然既吞吐分明爲甚道咬不着僧問
如何是月師云麻餅進云如何是指師云菱角進云
月指兩忘時如何師云笑破石榴口進云恁麼則翫
月已竟師云拄杖子且待別時喫
小叅道不遠人何者卽是真不異俗就裏難明三十
年行脚諸方壁立萬仞覓箇蹤跡不得阿呵呵毘婆
尸佛早畱心直至如今沒奈何

壽昌雙峰和尚訃至小叅訃音一聽便心驚設供拈

香雨淚傾悲痛老成相繼往法門寥落倩誰撐雖然
既入虎穴豈無虎子這便是我祖翁堂上第三十四
世雙峰存法兄紹先啓後底面孔今向天界香煙堆
裏相見罷獨唱還鄉別調詞

小叅豎拂子云文殊普賢觀音地藏來也諸人見麼
見則事同一體如未不妨註破一則善說法要一則
能行妙行一則慈悲廣大一則願力弘深直下檢點
得出驅使自繇應以善說法要而得度者卽遣善說
法要而度脫之應以能行妙行而得度者卽遣能行
妙行而度脫之應以慈悲廣大而得度者卽遣慈悲

廣大而度脫之應以願力弘深而得度者卽遣願力
弘深而度脫之若檢點不出却是諸人辜老僧卽非
老僧瞞諸人

元宵小叅燈月交輝灼破虛空面孔鑼鼓喧天穿徹
大地耳門人人盡道鬧元宵還知觀世音菩薩只今
在甚麼處呵呵大笑云眼見耳聞正好疑着

小叅舉道吾云高不在絕頂富不在福嚴樂不在天
堂苦不在地獄相識滿天下知心能幾人徑山道我
則不然高在絕頂富在福嚴樂在天堂苦在地獄誰
知席帽下元是昔愁人天界又不然絕頂高福嚴富

留述
卷一
天堂樂地獄苦處處本現成頭頭沒張主若張主葉
落花開春復秋日往月來今猶古且道三人一鼻是
同是別

臘月八日小叅今朝是釋迦老子雪山六載一觀明
星換却從前眼目打失向上鼻孔底時節天下主其
法席底勿論處之廣狹人之寡衆都要借此爲題以
便開口吐氣舉古拈今大家開闔底搬弄一場謂
之上堂慶賀世尊成道山僧雖住名刹意在隱靜不
攀這些條例祇有一則現成公案不妨與諸人落草
盤桓庶幾時無虛度也此老初曰天下獨尊後道一
切俱有還是同是別向這裏見得透徹分析清楚不
愧爲他嫡骨兒孫如或未然且向深固幽遠無人能
到處大死一番過來始得

小叅師豎拂子云會麼這件事教不得學不得傳不
得若教得依他作解若學得非已智分若傳得勿勞
自叅必須向當人脚跟下爆地一聲斷了命根死盡
偷心無師自智觀體現前始知一切諸佛及諸佛法
皆從我出我亦本空不住空相騰騰任運蕩蕩無爲
隨處稱尊遇緣利物設若盡大地三草二木各出問
端不消拂子一揮一時酬畢諸人還會麼乃擲拂子

云百千妙義皆他玩一段風光自出奇

小叅盤根錯節簇錦攢花利口辯詞尖新巧妙直饒
道理上說得十分相應不若脚跟下踏着實處一步
始不虛費草鞋錢不然整頓算零帳喫虧在後頭

立夏小叅一陽發百草增輝一霜降千峰失色寒時
處處寒熱時人人熟流光風捲雲奔此事銀墻鐵壁
欲出無路欲入無門汝旣切切叅學我亦的的指示
轉法輪於烈火焰中翻全身於電光影裏脫或遲疑
自成鈍滯爭恠得弘濟昔歸宗門下有箇僧半夜經
行忽然大叫曰我悟也我悟也傍僧把住曰你悟箇
甚麼其僧曰師姑元是女人做大抵古人說夢真實
不虛檢點將來疑煞天下弘濟門下如有恁般底脫
下汗衫痛與一頓使他脚跟下有箇落處去

四月八日修藏社主佛上座小叅師揮拂子云今朝
是大吉良辰摩耶夫人別通一竅老婆心盡情剖露
悉達太子突出全身小厮兒徹底風流直教九龍水
洗不淨雲門棒打不開從昔至今年年此月此日勿
論西乾東震繪像鏤形底承此時節都要向高處稱
尊令人徹見本來面目豈知法身無爲不墮諸數諸
數旣不墮喚甚麼作法身大衆會麼如未且於藏社

殿裏瞻仰全軀思惟取足擲拂子下座

中秋小叅江上清風拂拂山中明月團團聞見本同一體聲光各自流傳弘濟今宵借此佳境與諸人舉揚箇事乃豎一指云看看還會麼認着老僧指頭失却諸人眼目

觀音庵主佛上座劉調元居士請小叅師至佛前卓杖一下云觀音庵裏佛三尊鬧市場中僧一箇混跡和光指示人當機靦面休空過所以道有時將瓊樓寶閣作鐵壁銀山有時將虎穴龍宮作天堂佛國有時將一莖草作丈六身有時將盡大地作一微塵且

道得甚麼消息便恁麼作加復卓拄杖云若人識得這東西信手拈來總不疑是法本無有上下更從何處覓高低

小叅坐斷千峰辜負先聖垂慈橫行鬧市屈辱從上宗風只饒隨緣而住未免混跡常情縱能擇處而居却又自生分別且道畢竟如何始得入火無燒痕入水無濕跡豎起拂子云盡大地是箇鐵圍圖你作麼生穿鑿

小叅乾坤顛倒顛日月錯就錯何似山僧拄杖子峭巍巍兮活鱖鱖于眼大悲看不見八臂那吒摩不着

雖然如是要用便用又曾瞞得那箇來

小叅卓拄杖一下復揮拂子云拄杖梗直拂子委宛應折伏者而折伏之應攝授者而攝授之或有孟八郎漢出來道彼旣丈夫我亦爾拄杖拂子呵呵大笑曰只恐不是玉是玉也大奇

小叅打三打七惟此一事了得一事萬事俱畢不見古德道二因一有一亦莫守必須向百尺竿頭進步萬仞崖前撒手始知高不在天厚不在地只要拄杖子直下承當

佛成道日小叅年年臘月初七八一切妄想都凍煞

自古從今悉達多天上人間稱釋迦所以道實須自立名要人傳雖然如是弘濟拄杖子未肯點頭在有名無實底從空挂起無名有實底就地放下名實兩全底二俱拈開名實并無底一齊擲却且道拄杖子向甚麼處相見乃卓一卓云劍去久矣

劉調元居士造西方三聖請小叅彌陀觀音勢至三身一合理相大雄大願大悲無上無等無量堂堂乎容顏圓妙巍巍乎形體殊好湛湛乎光明廣大雖然如法稱讚未免猶有分別須從威音那畔坐斷三身向今世門頭廣行萬行到這裏生佛齊平昔今無異

三世不隔毫端十方只在當念若干燈一室焔焔交
輝一月千江光光互涉非先非後無間無礙靈靈不
昧於尋常了了恒明於日用正所謂卽心是佛非成
不成無出不出興慈運悲非生示生無相現相茲調
元劉居士乘夙願力示現受生從平等自性造殊勝
妙相工完擇吉上座開光設供恭請山僧舉揚佛事
普令他方此界瞻仰合掌禮拜低頭底應無所住而
生其心共證本來智慧德相與佛不二大眾還知麼
還會麼識得本來真面目何妨萬別與千差一毛頭
上十方界諸佛衆生共一家

小叅破有法王出現於世隨衆生心而爲開示破有
且置還知開示箇甚麼莫是諸法不自生亦不從他
生不共不無因是故說無生麼莫是業障本來無心
差轉見殊若悟三空理何處不如如麼莫是一切有
爲法如夢幻泡影如露亦如電應作如是觀麼若只
恁麼則當今多口阿師亦應詐此名頭其或別有長
處且待木上座勘過始得

一卷終

住江西南康雲居山真如禪寺語錄
 順治丙戌十月十二日受給諫熊青嶼給諫熊約生
 及諸山耆舊請住雲居真如寺至十五日入院
 結制示衆拄杖子一向不說話今日事不獲已却說
 話去也你道他說箇甚麼得人不在衆當機不讓師
 謂是佛法謗他拄杖子入地獄如箭射謂非佛法謗
 他拄杖子入地獄如箭射總不與麼亦謗他拄杖子
 入地獄如箭射畢竟作麼生叅

方融聖師語錄卷第二

門人與林等編

住江西南康雲居山真如禪寺語錄

順治丙戌十月十二日受給諫熊青嶼給諫熊約生

及諸山耆舊請住雲居真如寺至十五日入院

結制示衆拄杖子一向不說話今日事不獲已却說

話去也你道他說箇甚麼得人不在衆當機不讓師

謂是佛法謗他拄杖子入地獄如箭射謂非佛法謗

他拄杖子入地獄如箭射總不與麼亦謗他拄杖子

入地獄如箭射畢竟作麼生叅

示衆僧問師唱誰家曲師云一曲兩曲無人會進云宗風嗣阿誰師云雨過夜塘秋水深進云如何是一門超出師云七通八達底不去徧向一門超出僧拜退師云祖師不會西來意夫子忘懷上大人說與時人不肯信盲龜跛驚最相親驀卓拄杖云珍重

掃磨祖捨拈拄杖遶埵三匝卓一卓云這座窄堵波自唐宋元明今近千載聲跡尚存喚作古捨辜負今人不喚作古捨欺罔先聖畢竟作麼生兩得相應去看取壘上座撒開坐具大展三拜

示衆僧問如何是趙州關師云大遠在乃云盡大地是個趙州關有一等人未入謂入欲出沒個出處有一等人未出謂出欲入沒個入處有一等人未得出入自由謂得出入自由欲出入自由時又沒個出入自由處此三等人費盡伎倆還有透脫分也無苦瓠連根苦甜瓜徹蒂甜

示衆僧問如何是道師云步步踏著進云如何到家師云虛費草鞋錢乃云拄杖子今日出來七縱八橫去也諸人還見麼隨卓一下云差之毫釐失之千里因齋示衆菜盈盆桶飯盈鍋雲板相邀海衆多托出滿盤無剩物大家同喫不同病既是同喫因甚却不同

同痾叅

示衆僧問如何是第一峯師便打進云學人不會師云別處相見乃云拄杖今朝自走輓伸手打著虛空腿一時痛徹山河骨萬象森羅齊咄嘴諸禪德難行能行難忍能忍不犯損傷切忌走水

歲旦示衆僧問如何是第一義師云燈燭交輝進云如何是佛師云百草頭上露堂堂乃云昨朝臘月三十日拄杖子一人與多人神通法戰檢得一條性命猶自不知利害到今朝正月一日更在這裏橫行豎走闊步大方道有也三十棒道無也三十棒會得也

三十棒會不得也三十棒但凡撞著都不空過何爲如此於諸供養中法供養最勝

示衆舉誌公道終日拈香擇火不知身是道場玄沙道終日拈香擇火不知真個道場師云古人與麼道大似將古道場作香火院山僧則不然道場香火且拈放一邊只如無孔鋏鎚作麼生解僧問如何是個中消息師云一個葫蘆兩把瓢進云意旨如何師云東邊賣賤西邊賣貴

示衆舉盤山云心月孤圓光吞萬象光非照境境亦非存光境俱忘復是何物洞山云光境未忘復是何

物師云二老與麼道大似看光境說話雲居則不作
恁麼見解光境物象且置九霄雲外卽今喚甚麼作
月乃豎指云喚作吾指瞎却汝眼

二月十五日示衆僧問如何是道師云多虛不若少
實進云一口氣不來向甚麼處安身立命師云雲從
龍風從虎進云如何保任師云自棄漢乃云二月半
花朝節雷震長空地裂交叅龍蛇出頭來跛鱉何
能離本穴卓拄杖云這裏有凡有聖有死有活檢點
不出瞠却眼兮剔起睂再待明年春二月

二月十九日示衆僧問觀音大士卽今在甚麼處師

云插從耳裏發聞向鼓邊生乃云文殊生不生普賢
滅不滅初下犢牛插角陳年確嘴生塵觀世音菩薩
將錢買餠餅放下手云原來只是個饅頭然雖如是
從門入者不是家珍哩哩邏頻呼小玉原無事只要
檀郎認得聲

因齋示衆欲見本來面目切須仔細精研百搯碎透
過新羅團圞頭旋蒸熟賣僧問如何是三寶師云兩
食硬飯一食粃進云如何滋味師云不是飽餐人不
知

因事示衆一向散誕過了今朝從新緊起莫使王風

撰述
神主水神向溪頭樹尾揚聲大叫水牯牛水足草足
明月湖一片閑田荒却了也

示衆僧問如何是見見之時見非是見師云老年花
似霧中看乃云本色鉗鎚有得有失有利有害枚舉
不得浪抑不得猶如度無頭線穿沒孔針具眼衲僧
頓識根源流輩阿師當面錯過兄弟家有問則問無
問則止也不得妄生枝節也不得無風起浪平常之
外更平常法界人天合仰望且如仰望個甚麼眼似
銅鈴口如木鐸

示衆舉古人道若人識得心大地無寸土雲居道若
人識得心大地盡是土盡是土無寸土紅棗甜黃蘗
苦馬師還鄉道不香達磨西來稱鼻祖此疑決向杖
頭邊信爲道源功德母僧問悟心底人同一理性因
甚麼所見不同師云待汝悟心了來向汝道

出山示衆古人行脚竿木隨身雲居出山一物不帶
赤條條任意縱橫脫灑灑逢場作戲藏身之處沒踪
跡佛魔牛馬任人呼僧問船到江心時如何師云看
風使帆進云風恬浪靜時如何師云隨流得妙進云
水柵橫排時如何師云一點便過

迎傘居和尚龕歸雲居因請示衆大凡善知識出世

接物利生無逾遊化依止二種垂鈎四海只釣獐龍
惟我傘居和尚緣生順天祝髮圓照初叅空印大師
知侍三載獲根本智一日辭去印授藤杖擗笠遂來
南方叅蓮池達觀憨山諸尊宿輩水乳相契而憨師
識師非凡謂師五十後名振海內多方淘汰緣熟楚
邵首建精舍額曰五臺爲初出世法幢二十餘年每
以一乘法分別演說七衆歸依甲戌秋禮德山揖南
嶽過西江越二載凡所至處歸者如市丙子夏應五
雲蘇溪請復往匡山五乳掃塔丁丑冬駐錫雲居相
繼七載獨立峰頭大開鑪鞴煅煉聖凡四方學者雲

湧波從有怯高畏險者望崖而退癸未秋復邵陽舊
址溯流而上舟抵螺川江咽梗塞掉轉蓬橋泊淮浙
下金陵建紫竹禪林於丙戌夏日忽厭世緣示微疾
而逝不肖弟子璽等恭就雲居峰頭卜得一穴最吉
祥地特請歸山重爲安厝諸仁者且道傘居面目畢
竟作麼生見酌恩不在爐香上別有清風灌石樓僧
問和尚靈龕今請歸山未審和尚歸也未師云快哉
此問進云畢竟如何師云惱亂春風進云和尚涅槃
向甚麼處師云兩脚梢空
結制示衆將拄杖子劃一劃云拄杖一劃大地成牢

撰述
截斷封疆囚龍困象只教一個個皮毛盡脫頭角重
生拽轉鼻孔更與三十棒因甚如斯我今爲汝保任
此事終不虛也

示衆無事不落堂落堂必有事告報學道人識取祖
師意你道祖師有甚麼意太湖三萬六千頃月在波
心說向誰

示衆清風兩欄竹耐暑矜寒明月一庭松凌霜傲雪
榮枯不逐四時一道齊平虛實融歸當念諸緣頓息
稟此剛骨乃可居山據是體裁方堪住世遊滔滔之
衆海竿木隨身登峇客之羣山斧鑿在手有過底須

重賞無過底莫輕罰放去靈狐養拙魚是中取捨元
來別僧問如何是金剛心師云棒打石人頭

示衆是法平等無有高下恁麼則白牯狸奴與上佛
祖同一肚腸喫茶喫飯共一鼻孔出息入息諸佛無
生可度衆生無佛可成因甚分凡分聖曰悟曰迷一
切賢聖皆以無爲法而有差別僧問如何是無爲法
師云向下文長付在來日

解制示衆僧問六門豁達時如何師云一任七縱八
橫進云恁麼則俊俏去也師云走殺闍黎乃云打破
大唐國擊碎蠻夷邦草馬吼清風藤蛇穿明月是其

處莫住着非其處急走過超玄越妙則不無知恩報恩誰是其人

示衆舉古人道終日喫飯不曾咬着一粒米終日穿衣不曾挂着一縷絲師云與麼說話大似抱賊叫屈雲居今日和盤托出要你諸人着眼

四月八日示衆僧問指天指地時如何師云換却汝眼睛乃云未離兜率已降王宮未出母胎度生已畢拄杖子揚名挂榜從四大部洲行脚一回未曾撥着一個呵呵莫道不相逢相逢不相識

結夏示衆今朝四月十五日打掃禪堂好結制非是

高名弄套頭要人脚跟齊點地茗帚撮箕且拈放一邊喚什麼作地莫是佛殿裏光淨淨底麼莫是法堂前草漫漫底麼莫是高處高低處低麼莫是寬處寬狹處狹麼其如不然終日經行未曾踏着

示衆種田博飯直接上上之機閉戶安禪屈爲初心後學更若棄本逐末賣假懸真徒增舌口風流炊砂豈能成飯咎地藏問修山主甚處來修云南方來藏云南方佛法近日如何修云商量浩浩地藏云爭如我這裏種田博飯喫修云爭奈三界何藏云汝喚甚麼作三界修你去山僧今日爲你諸人頌出浩浩商

量十二時誰知話餅不充饑何如種田博飯喫一飽
高眠佛不爲

示衆舉天地同根萬物一體古人與麼道大似情與
無情等是自身骨肉爲甚牛喫關內禾却道犯他人
苗稼叅

示衆僧問如何是天子不臣諸侯不友底人師云納
衣荷葉常年種蓋頂茆庵屢歲苦進云還紹隆祖位
也無師云目下聲名由我斷寰中道德任人尊乃云
休去歇去濯足溪邊明月皎一念萬年枕流石上白
雲深樂道兮田歌牛笛忘情兮水綠山青一張鉏柄

生涯盡笑殺拈花未歇心

示衆山僧久無說諸人久無聞諸天散花有分魔外
進步無門有智王人二俱不取僧問牛頭未見四祖
時爲甚百鳥啣花獻師云乞兒見小利進云見後爲
甚百鳥不啣花獻師云君子防不然

示衆舉大丈夫秉慧劍般若鋒兮金剛燄非但空摧
外道心早曾落却天魔膽卓拄杖云這是般若鋒喚
甚麼作金剛燄震威一喝下座

示衆水流千轉終歸海鳥飛萬里必投林人生百歲
死向何處卓拄杖云要知山上路須問去來人

撰述
方圓師語卷之二
九
中秋示衆圓湛虛明孤光寂照盡大地山河國土頭
頭體露真常滿世間草木叢林物物顯發圓妙諸人
現前各各眼同見耳同聞身同任意同知爲甚雲生
一點對面千里僧問如何是月師云仰之彌高進云
畢竟如何師云徒勞摸索

解制示衆僧問木馬嘶風時如何師云逢人切忌道
向這裏去進云師意如何師云一人傳虛多人傳實
乃云百日頭百日尾百日中腰一樣緊時時刻刻痛
加尖密密綿綿不洩水鉢圍圖地一家風萬別千差
俱全美卽今放活一絲頭跛驚盲龜伸出腿舉拂子

云這裏有成龍化鳳底麼喝一喝云散

施主送法衣至示衆寸絲不挂猶帶沾黏百寶莊嚴
是名解脫且道得失在甚麼處拈起伽黎角云將謂
天青更有月白僧問千佛授受惟此一衣衣在這裏
佛在何處師展衣召衆云看取山僧着衣去衆回顧
師云汝等當着此衣

示衆拈拄杖云拄杖子今日出來踉跳分明賞罰有
過無過都與三十棒因甚如此是法平等無有高下
示衆舉祖師道眼若不睡諸夢自除心若不異萬法
一如那個是不睡底眼那個是不異底心山花開似

錦礪水湛如藍如有人理此心眼問山僧便向他道
有智無智但看剔燈掃地

示衆僧問久嚮山中有雪獅子及至親到爲何不見
師云非汝境界乃云數載雲居乏鹽沒醬清苦家風
黃齏淡飯不見雲去雲來一任松杉翠落單提拄杖
子傲雪凌霜寒則同寒熱則同熱卓一卓云仁義盡
從貧處斷世情偏向有錢家

結制示衆云劔爲不平離寶匣藥因救病出金瓶拄
杖子落堂七縱八橫擺個無門陣子把斷千聖路頭
直得內不放出外不放入鉄囪圖絕消息畢竟貴圖

何事千兵易得一將難求僧問如何是兵師云來于
去萬進云如何是將師云草賊大敗

示衆舉古人道你有拄杖子與你拄杖子你無拄杖
子奪你拄杖子大似爭之不足讓之有餘山僧則不
然有無與奪且拈放一邊喚甚麼作拄杖子良久卓
一卓云事因叮囑起

示衆僧問牛頭未見四祖時如何師云花開畱宿鳥
進云見後如何師云葉落不關風乃云一言不發萬
事皆如如之一字衆妙之門爲甚叅學上人多向這
裏走鞦若不同床睡焉知被底穿

禁火爐示衆雲居山高柴近屋經冬不許人搬入非是惜薪斷火爐欲使諸人寒徹骨

示衆見聞不到處切忌自生分別分別則是非生以拂子擊禪床云是非生也是聲是色還辨得麼咄夢話難禁醒人聞

示衆舉拂子云大衆看看莫道無來處從闍入浙從浙發杭蘇州也有常州也有高賣虛價只道別有長處在山僧手裏不值半文錢何故貨到地頭死僧問古今付法意旨何如師云祖禪不了

除夕示衆僧問如何得前後際斷師云你卽今有其

麼勾搭乃云燈花朵朵柴火堆堆豐儉隨時盃盤狼藉三世諸佛在諸人蓋子裏放光動地歷代祖師向諸人筋頭上轉大法輪報道明日是正月初一大衆只如臘月三十日一關且作麼生過得去若也過得卽此瓦解冰消其如未能明早抖擻精神同請大佛殿啟建天壽聖節

歲旦示衆僧問承師有言此事分明不在玄機妙辯玄機妙辯卽不問如何是此事分明師云香爐是香爐花瓶是花瓶又僧問學人初入山望師指示師云聽板喫飯進云道路生恁時如何師云人行過處汝

莫行乃云結殘冬制又是新年半途行脚底且教放下擔子安居賤睡漢從茲打點精神行底不許動着一步住底不許坐在一邊不行不住底正好朝打三千暮打八百因甚如此鴉鳩樹上帝意在麻畝裏示衆僧問麤言及細語皆歸第一義如何是第一義師云麤言及細語又僧問學人初心晚進望和尚指個入處師豎拳示之僧云不會師云驢年去乃云玄言妙語都被諸方說盡雲居只得無理可伸無言可道是汝諸人又作麼生行履看看

示衆僧問達磨西來所爲何事師云擔水河頭賣乃

云鳥飛不外天魚躍不出水拄杖子踣跳向甚麼處卓一卓云是法任法位世間相常住

解制示衆僧問萬法歸一一歸何處師便打僧云不會師云還我飯錢來又僧問畢竟一歸何處師便喝僧禮拜師云還我飯錢來乃云綿綿密密兢兢業業萬法歸一一念三月三月既竟一念亦歇解也得不解也得沒踪跡處解藏身甕裏何曾走却鱉

因事示衆西來一意勿妄宣傳流布寰區如春被物各得稱實臨濟祇解喝德山祇解棒雲門道箇乾屎橛雲居惟耕爛泥田僧問如何是德山棒師云虛空

撰述

大藏經前卷之三

三

支那

支那佛學叢書

三

一撰述
六國神師言卷之二
三
喫打進云如何是臨濟喝師云大地耳聾進云如何是乾屎橛師云啟口不得進云如何是爛泥田師云阿誰無分又僧問古今大意是同是別師卓拄杖下座

示衆僧問有句無句意旨如何師云一拔連根脫進云畢竟句歸何處師云野火燒不盡春風吹又生乃云有句無句山河大地十字街頭銀墻鐵壁將軍欲入破重圍勒馬擔刀還自失喝一喝云看箭

結夏示衆僧問黃昏雞報曉爲是不知時節爲復別有長處師云疑殺闍黎僧作雞啼聲師云放過一着

乃云出寒水獄入熱鐵牢兩忘罪福萬劫難遭險路上赤條條大家挨拶是今朝休待臨時沒下梢示衆雲板大叫諸佛子喫飯來木魚揚聲衆上座出坡去拄杖子踣跳上非非想處是甚麼無風起浪僧問如何是呼之不回遣之不去師云頑石頭進云還成得佛否師云待驢年

示衆舉古人云智不到處切忌道着道着則頭角生舉起拂子云頭角生也是驢是馬還識得麼師云與麼說話大似掩耳偷鈴欲隱彌露雲居則不然智不到處切忌道着卽如不道着亦是頭角生不是驢不

是馬是個什麼

示衆僧問如何是道師云春蒔秋收進云如何卽得師云眼親手快乃云惟此一事妙密難明巖處穴居風來雲去走爛草鞋底轉見不堪坐破蒲團底更爲狼藉爭如我這裏種田博飯喫事事成辦

七月十五日示衆今朝是中元嘉會古人道有條攀條無條攀例大似住世不越世雲居山高離市遠家常只有一味貧寧將清淡傳今古不把油鹽祭鬼神解夏示衆舉洞山和尚云秋初夏末兄弟家東去西去直須向萬里無寸草處去只如萬里無寸草處作

麼生去石霜云出門便是草明安云直得不出門亦是草師云三人證龜成鳖

示衆以拂子擊拄杖云拄杖子與麼長拂子恁麼短有人道得平等句許汝橫行宇宙僧出一喝師云再喝一喝看僧復喝師云知汝伎倆

示衆菩提涅槃真如麻三斤乾屎橛栢樹子諸方以此爲宗乘中之向上關楸子雲居這裏一拶粉碎颺向大洋海底永不復生何爲如此金屑雖貴落眼成翳僧問古人道二十年前有老婆心二十年後無老婆心如何是有老婆心師云爲插青桐引鳳來僧云

如何是無老婆心師云引得鳳來便折却

起鐘示衆華鯨踣跳蒲牢夜吼好事不出門惡聲傳

天下一作二不休朝暮喫打一百八僧問一椎擊碎

虛空時如何師云你在甚麼處僧擊鐘一下師云掠

響漢

結制示衆僧問如何是今日事師云龜毛索子縛虛

空進云南泉斬猫意旨如何師云一刀兩斷乃云古

人結制豎拂爲牢關劃地爲坑塹於百日内籠陷學

者向三光不到處冥摸暗揣東揆西挨互相推排兢

共馳走偶向交錯不及處驀鼻相撞便謂之密投謂

之默契生難遭想得少爲足雲居這裏無制可結縱

有此舉不但不教人蹋古人故轍更要與他推倒界

墻掀翻巢臼截斷廉纖疎通道路黑漆團瓦解水銷

大明咒照天照地使人人面前空濶個個脚下行得

有佛處莫住着無佛處急走過水窮山盡卽不無衆

中有知過必改底麼僧問大唐國裏不許安身蠻夷

邦中無容住足且道過在甚麼處師云無住處進云

住後如何師云其過同前

落堂示衆向日自落堂今朝請落堂自落堂行人思

道路請落堂坐客難打發衆中有打發得客底主人

出頭相見僧問如何是主師便打進云如何是賓師
便喝進云如何是賓主道合師云答在問處
示衆默時說說時默大施門開無雍塞僧問說與無
說卽且置如何是大施門師便打進云恁麼則魔佛
一如師又打乃云默時說說時默大施門開無雍塞
一任魔來與佛來驀拈拄杖劈頭楔僧問某甲乍到
此間乞師一接師云爲山來爲水來僧云爲道來師
云國禁甚嚴僧云望師密通一線師云廬陵米價作
麼生僧云謝師探問師云木佛不度火泥佛不度水
意作麼生僧云自救不能師云墮坑落塹

爲傘居和尚入塔舉古人道撩天索價就地還錢得
者不輕微與者無少乏是雖渾買渾賣全放全收爭
似雲居守舊如新安貧若富事獲現成收因結果萬
仞峰頭地大堅雲深無縫塔撐天黃金白玉從今入
明月清風萬古傳

臘月八日示衆僧問如何是佛師卽掩耳僧云請師
荅話師云你問甚麼乃云雪山非寒火海非熱一念
萬年盲龜跛鱉若謂今日成道大似餽餅裏呷汁
上元日解制示衆雲居結制已百日日鉢盂兩度
濕有未咬着一粒米底山僧將鉢袋子與你去如無

自領回不敢累及平人收收拾拾大衆有不自昧力能荷擔底麼衆默師肩拄杖歸方丈

示衆天長地久佛日恒輝秋去春來法輪常轉人生於是中經行及坐卧合作甚麼邊事能爲萬象主不逐四時周

示衆僧問某甲日用事不明空過時光乞和尚開示師云拜也拜了問也問了更有甚麼不明說個空過了底話僧云不知師云不知最親切只要狂心歇教中云不知是智知是妄想卽此不知底是汝本來面目雖最親切只是無汝下手處無汝思索處無汝着

眼處無汝啓口處動念則隔擬向則乖如鏡圓圖相似汝必欲明必欲知切忌不得離却無下手無思索無着眼無啓口處打定個主意猛下個狠心如生冤家相似拚着一生與之死捱捱來捱去心忽發光迷悶頓釋因地失笑一聲知與不知總是自家本分事清明示衆拄杖頭邊月拂子尾上風變大地作黃金攪長河爲酥酪且道是何三昧將拂子挂拄杖上喝一喝下座

示衆僧問學人做工夫昏睡多時如何排遣師喚云惺惺看僧重請開示乃云凡做工夫底人昏睡多遣

不開有兩種病不是生死心不切便是坐在無事甲裏所以悠悠忽忽向半明半暗裏簸弄精覓若是生死心一切正念現前正念現前如日普照縱有如山底昏睡不待遣而自然冰釋矣

示衆僧問提不起放不下時如何師云累殺闍黎僧云如何是和尚爲人處師便打僧云除此別有方便麼師復打乃云拈起拄杖頭高出萬峰頭按下白雲頭花開古樹頭特地起波頭拳拳問話頭棒棒打叅頭長安大道脚跟頭不是冤家不聚頭

示衆僧問見而不見向甚麼處安身立命師劈面便掌進云這一掌落在甚麼處師復掌乃云大道廓徹洞然無物遇境逢緣雷轟電掣束包行脚底爲他擔夯結屋安居底自取葢覆爭如我這裏種田博飯喫一了百當有般漢雖過兩關未到無事真地暫得一念子寧怙便就飽食高眠強名得道禪定非習智慧無修耽守幽閒誤爲究竟偶時心境內發依舊驢揀濕處尿

示衆僧問如何是清淨心師云有甚染污進云蓮花未出水時如何師云萬卉不如進云出水後如何師云不如萬卉乃云堆金積玉貧窮無限破產蕩家富

貴有餘言犯勾陳見逢回互一疑疑殺天下人一信
信殺天下人咄不是知人休說夢話

示衆諸方有折龍角捋虎鬚高山頂上網魚深海底
裏捕兔底大似向險異處藏身雲居這裏寒煨楮
火夜間稻草舖睡饑時用茶淘飯喫水牯牛走下明
月湖喚牧童趕起有甚麼奇特雖然如是明眼人難
瞞

示衆種田博得家常飯住山不用買柴燒生涯本分
只如此安眠飽食任兒曹雖然如是要切記早起來
了下單下單了洗面洗面了禮誦禮誦了喫粥喫粥
了出坡出坡了洗足洗足了喫茶喫茶了止靜止靜
了放叅放叅了過午從朝至暮行坐次第語默平常
諸有所作惟此一事若道別有佛法便是向外馳求
雲居門下無如是漢僧問一氣不來向甚麼處安身
立命師云鑊湯鑪炭

誕日因齋請示衆七月七阿娘生我犯好日若不犯
好日怎得圓通力有生有滅也不是無生無滅也不
是非有生非有滅也不是非無生非無滅也不是離
四句絕百非無量劫來消息在不須向外別搜尋僧
問千峰圍遶卽不問皓月當空時如何師云爍破汝

面門進云如何是無量壽師云過去無始未來無終
進云無位真人年多少師云同爐無異金

示衆此事不在說上不在道理機緣上不在聞上不
在思量卜度上欲明此事第一不得離却說道理聞
而思量別求方便只要緊究本話在意而不在句也
久久提撕自有徹頭底時節

中秋示衆賞月不許人問話山僧有則現成公案問
汝等各着一語看晝夜百刻十二時循環逆順織干
支周于爲甲周甲爲季周季爲年三載兩頭閏一月
一盈虛因甚今宵更明衆着語不契乃云月有照人

心人無看月意好境多錯過相見不相識旣相見因
甚却不相識

示衆日出東山和光混俗月沉西海帶水拖泥堂上
燈籠照天照地且道他具甚麼眼

示衆從天降下不是家珍從地湧出亦非故物從人
得的未免依他只饒一切無着我而誰外道天魔
是其同類畢竟作麼生行履得出格活路叅

結制示衆僧問諸方堂奧卽不問如何是曹洞宗旨
師云你道大唐天子司何官事進云恁麼則獨尊去
也師云阿誰不蒙恩又僧問目前結解卽不問不結

不解時如何師云杖頭書令字進云意旨如何師云封石將軍下海洋僧禮拜師將拄杖一卓云今朝是秦山石敢當汾陽道底避之大吉更問如何若何一任赤口白舌也須頭破血出大眾還有知而故犯底麼眾默然乃云三月日前張網捕風三月日後掉棒打月正當三月日霜上加雪靈龜甕裏深藏六徒勞拄杖外周折

因事示眾諸方有拿驢脚過橋按牛頭喫草底雖是屈已爲人未免強扭強捏雲居這裏無此苟就有路與人行有門與人入有單與人安有茶飯與人喫有

田地與人耕有夏與人休有冬與人結有禪與人參有道與人悟事次第法法現成不費心力放下便是是則是道辨雖不借他力爲人自肯乃方親

小年示眾大年將竟小年至直歲功曹盡收拾天神歸天地祇歸地金木水火風雲雷雨各安方位惟有緊那羅王菩薩無所從來亦無所去年年爾月月爾日日爾時爾與諸人們語默閒忙處處相聚大眾有見緊那羅王面目底麼震聲一喝以拄杖作擎義勢下座

臘月三十日示眾三十說話今古調同各諦思惟自

知虛實山僧一年得恁麼閒諸人四季得恁麼忙閒
忙則且置祇如水牯牛同在田裏有幾頭不犯苗稼
甞路遙知馬力歲久見人心

示衆僧問馬祖道自從胡亂後三十年不少鹽醬意
旨如何師云過得不爲貧乃云居山十五載未將鹽
醬與人喫今日事不獲已隨分與些子若作鹽醬會
不但二時粥飯一滴水也消不得

新春示衆寒破風吹萬象新山河一曲和陽春拄杖
跳上須彌頂百城煙水杳無垠彌勒樓閣向甚麼處
入海濶從魚躍天空任鳥飛

解制示衆天無日不清地無日不寧日月無日不光
明江湖無日不流通人無一日不常情且如拄杖子
今日合作麼生卓一卓云傲雪凌霜九旬盡敲風打
雨一場空

示衆大業無成大悟無心箇中神用世所希聞目下
見得底驢馳車載過後聞名底塞壑填渠檢點將來
未免掃地狼藉殺也預先知不由人皺兩莖眉勘驗
今人行底事歷然徹見未來時

因事示衆僧問佛說含靈蠢動皆有佛性因甚趙州
道狗子無師云莫謗佛祖進云是非不到處還許學

人開口否師云是非生也進云大名之下則無不肖因甚賢愚混雜師云家無小使不成君子進云恁麼則水火同器去也師云非汝境界進云瓦解冰消時如何師云喫痛棒有分在僧禮拜師云上大人丘乙已好者生惡者死一狀領來盡送官打破沙盆問到底只因潘郎倒騎驢喫却馬郎街頭米尔小生八九子可知禮也

示衆說法不容情容情不說法僧問且如情法兩忘又作麼生相見師云如鏡照鏡進云恁麼則兩無朕跡師云分合不到處急着眼睛看進云水到渠成時如何師云莫教打濕袈裟角乃云空得一分知解見得一分法身遣得一分妄想證得一分真如若只恁麼言通義會喻去譬來驢年也是沒交涉

結制示衆大巧若拙大智愚隨波逐浪數年餘媚狐狡兔乘風去剩得金鱗透網魚僧問承師有言菜裏不放鹽茶裏卻添醋意旨如何師云換卻汝舌頭進云學人無舌時如何師云換了也進云學人有舌時如何師云更與一條僧無語師云未結制前諸人有出身處山僧則無已結制後山僧有出身處諸人則無僧問已結未結今且置如何是堂中事師云拄杖

踣跳進云師意如何師云動着則三十棒進云只如不動着時如何師云一棒也饒你不得
普茶示衆鼻孔長眉毛短遠聞近見除明月湖邊萬峰頂上那個山門口不解說道理茶話文章語錄縱能逗到十成未免半僧半俗拄杖子道底如意子不肯如意子舉底竹篋子不信比比不肯信推車拒象輦忽遇個定天平底來且作麼生判斷自家打掃門前雪莫管他人瓦上霜

重陽普茶示衆九月九又有花糕又有酒雲居也無花糕也無酒只有本地菓子本山茶菓熟茶香與諸人同坐同飲應個時節若謂不會登高元來不在山下僧問如何是第一峰師云櫃子兩頭尖進云如何是須彌頂師云核桃團圖圓
因齋示衆金牛飯趙州茶雲門餅和盤托出要用便用不用則且拈放一邊卽如衆居士與山僧一面未見百里聞名向平白地上望遠登高上山不乘輿下山不跨驥要來則來要去則去是恁麼物得與麼快便百年三萬六千日返覆元來是這漢

示衆臨濟德山來也爲你諸人露個消息去卓拄杖云見麼喝一喝云聞麼若見得八百眼功德若聞得

千二百耳功德如未山僧失利
示衆水凌上推倒車劔刃上跨烈馬豈是尋常作略
而得行步乎正且如寶鞘未張一羣已射底又具甚
麼手眼僧問推車跨馬俱不問如何是一羣已射師
震威一喝云阿誰不穿卻

起耕示衆雲農道人鼻孔翫佛法未曾通一竅開口
何用別商量惟有耕田爲緊要鋤柄隨身入水泥那
怕風吹與日曝淺深冷暝自家知說到何如行得到
青山無語仰自高黃鳥逢春隨處叫言與無言雖一
般究竟離言猶更妙達磨西來一字無世尊拈花惹

人笑只饒說得水逆流不若披蓑戴笠帽春耕夏時
秋有收老達老實常遠道龍天不昧苦心兒誰不肯
將佛種紹

示衆良久云會麼山僧無說說諸人無聞聞欲得不
招無閒業莫謗如來正法輪

衆執事請示衆僧問和尚久未陞堂大衆仰慕如渴
今日陞堂如何指示師云兔子望月進云如何是親
切句師便打進云如何是勘辨學人底句師云速道
速道進云學人不道時如何師云亦知汝落處進云
學人落在甚麼處師云蝦跳不出斗僧禮拜師云盡

道風搖樹誰知樹惹風凡事從兩來孤掌不浪鳴汾
陽罷晚叅梵僧勸請慈明不上堂楊岐逼出看這一
夥沒巴鼻底老古錐得恁麼厮揚厮抑賣俏莊憨高
擡聲價誑惑世人演襲成風有甚麼了日雲居今日
事雖共轍應不同途還借古人鼻孔出氣去也諸人
會麼經有經師論有論師爭恠得老僧

示衆拄杖子今日出來從東廊下西廊上前堂入後
堂出團圞一頭諸人落處拄杖子盡知拄杖子來意
諸人叵測且道差別在甚麼處官不容鍼私通車馬
辭院示衆古樹無心向此栽幾番葉落復花開倚門
久立意非別等個人來便活埋所爲古佛良田舊家
故物住則便住不住則更不須僉花押書名字親手
拈出覲面交付絕承當底努力承當沒擔荷處挺身
擔荷惟有拄杖子是自所招報無相付累還自領過
拈來浪跡諸方去涉水登山探淺深

出山示衆一義二義閒家故具今觀當觀綠水青山
舊長老新院王相別相畱且道住卽是不住卽是鉢
盂峰踰跳上非非想處明月湖特地波生獅子象馬
牛龍蛇魚蝦等切莫動着一個何爲人境從今齊放
下纖毫不挂轉風流

吟風眼倍空僧云百年後向甚麼處師云天不容地
不載僧云恁麼則藏身之處沒踪跡師云隆冬嚴寒
將錢買火向僧云學人不會師云待汝夢見山僧來
僧問如何是在窟獅子師乃良久僧云如何是出窟
獅子師震威一喝僧云如何是咬人獅子師劈面便
掌

僧問大修行人還落因果也無師云落卽不落昧則
不昧僧云前後百丈被師一口吞卻師云這野狐精
僧問南泉斬猫意旨如何師云活人屋裏死人無數
僧云畢竟何過師云終日飲血噉肉不知身是羅刹

僧云趙州頂草鞋出又作麼生師云取笑傍觀

居士問時人以錢財爲貴沙門以何爲貴師云以貧
爲貴士云貧有何貴師云不作守庫奴

僧問如何是向上一路師云五老峰高僧云如何至
頂師云看脚下僧云不涉途程峰頭已到師云縱能
玄會得終不及親臨僧云和尚可曾親到否師云舉
身天地外別是一乾坤

僧問達磨西來所爲何事師云直指單傳僧云直指
個甚麼師云烏龜是鱉僧云單傳個甚麼師云秤錘
是鍊僧云喚作佛法意得麼師云入地獄如箭射僧

云不喚作時如何師云拔舌犁耕

一婆子禮師足師云新年頭事如何婆云未曾過這
邊師云莫在那邊麼婆云那邊亦不住師云卽今在
甚麼處婆擬議師便與一掌婆作禮云和尚恩大難
酬師復一咄

僧問如何是佛師云莫汚老僧耳僧云如何是法師
云撮土揚塵僧云如何是僧師云逞甚伎倆僧云如
何是一體三寶師云問話了禮拜去

僧問十方薄伽梵一路涅槃門如何是涅槃門師云
旋出旋入

僧問有物先天地無形本寂寥能爲萬象主不逐四
時凋請問和尚畢竟是個甚麼師云死猫頭僧云還
成得佛麼師云驢年去

僧問殃屈救產意旨如何師云佛口所生子僧云因
甚前不早後不遲師云時節一至其理自彰僧云畢
竟功歸阿誰師云恰恰

僧問大通智勝佛十劫坐道場佛法不現前不得成
佛道如何是佛法師云清涼山高洛伽水深僧云如
何是佛道師云昨日有人從粵東來說吳西山水佳
奇大好翫賞僧云未現前時如何師云描不成畫不

就僧云已現前時如何師云塞壑填溝

僧問乾屎橛意旨如何師云你還咬着麼僧云我嘗於此切師云不是好狗僧云爲甚麼不肯學人師云猶有這個在

僧問大慧禪師道喚作竹篋子則觸不喚作竹篋子則背不得下語不得無語速道速道師云山僧不道僧云因甚不道師云我不爲蛇添足

僧問萬法歸一一歸何處師云雲居蘿苜洞山薑僧云學人不會師云你若會賣去在

僧問如何是佛祖的的意師云虎鬚林裏撒珍珠僧

罔測師云風不入無孔之壁

僧問某甲久嚮名德自遠親近師云大有人墮坑落壘僧云乞師一接師云甚處來僧云南嶽師云聞祝融峰踣跳上三十三天是否僧無語師云虛費草鞋錢

僧問如何是鐵牛機師便打僧云如何是悄然機師便喝僧云如何是圓通機師云山僧這裏無剩語僧禮拜云領師云領你爺領你娘

僧問心心莫測時如何師云你是阿誰僧云說似一物則不中師云卽汝不說時又作麼生僧云體露堂

堂本現成師云百草頭上薦得底猶是向外馳求
僧問去聖時遙人心不古如何得無過失身語意業
師云我嘗於此切僧云如何是露地白牛師云你有
甚麼蓋覆僧云得者如何師云不踏生草僧云還落
異類也無師云曾在雲居種田博飯

師在巖前立忽見一老者問好座巖龕只是無佛師
云佛則有只是無人禮拜者云既有佛爲甚不禮拜
師云不識者卽禮拜師云三十年爲僧今日被俗人
覷破

一童子問道也者不可須臾離也可離非道也離與
不離則不問如何是道師云把燈覓火子云孔氏之
道與釋氏之道有同別乎師云一以貫之

三僧入室作禮師云甚處來一僧云翠巖來師云聞
翠巖新佛是地藏化身果否僧無語師云不會出去
又問一僧你從何來僧云圓通師云死貓頭解咬鼠
否僧無語師亦云不會出去一僧云某甲記得一則
機緣請問和尚師云舉看僧云答有施主婦人入寺
行隨年錢一僧云聖僧前着一分婦人云聖僧年多
少僧無語請和尚代一語師云你有多少錢僧無語
師云兩個死漢一坑埋卻

撰述
大圓禪師語錄卷三
五
僧問佛佛相授祖祖相傳未審傳授個甚麼師云你知我見僧云既是知見一如何用指龜爲鱉師云劔逢烈士贈琴遇知音彈

一僧入室作禮云某甲自遠趨風而來乞和尚指示師云將你遠趨底風道看僧云聞和尚居山歲久少情識多孤高說法不帶枝葉師云遠賺你來何處人氏僧云廣東師云曾到曹溪否僧云曾到師云聞靈通小師慣顛酒是否僧云是師云既是靈通因甚麼卻被酒顛僧無語師云投子道底

室中垂語

欲明此事先淨其心心一清淨此事現成喻如磨鏡垢盡明見淨心之方無逾放下爲妙故云節儉放下最爲入道之捷徑言放下者不獨教汝放下世間根身器界法要將出世間菩提涅槃法也要放下若單放下世間法但去籠塵細垢猶在仍於此心不得清淨并將出世間法一總放下盡除細垢其心圓淨經云淨極光通達是也再將放下俱空不住空相深入妙淨無碍境界入此境界動靜不二一任搬柴運水送客迎賓種種方便應現權實猶如波中明月逆順皆圓頂上神珠縱橫自在非離非卽無去無來久應

撰述
大前所師言卷三
六
暫現皆是無作妙力自然成就所以道其心淨而此
事明矣

至道平常不犯周折至理直捷不假巧說魯趙州問
南泉如何是道泉云平常心是道又有僧問一老宿
如何是至理宿云家常話是至理難道古人不曾說
沒學問爲甚發言出語最夷坦最親切直下替人斬
斷命根當時古尊宿若用些華言巧語打發學人斷
不能容至今日聞之如甘露懷之如父母也誰知近
代已來道風大變勿論老成後生有解無解但有些
因緣福報底稱善知識一見學人來問佛法便道一

聯粉飾語一陞堂說法單用文詞莊點全無直捷使
聞者濟蕩浩瀚不解所歸返記取許多閒言閒語惑
亂心懷如是行事忽略古風欺瞞後進豈善知識爲
人乎

管靈源謂圓悟曰學者雖有見道之資若不深蓄厚
養發用必峻暴非特無補教門將恐有招禍辱當時
此話師爲圓悟勤說殊不知借圓悟名發揮後世之
蔽病耳蓋古入道德學問蘊於胸中惟恐人知惟怕
人見癡癡呆呆二三十年潛於林下不露圭角事不
獲已吐出一言半句自出平常人獲之爲至寶所以

相傳綿遠不絕者此矣今人則不然纔入門牆一角尚未踏著便云我是衲僧竊得古人一知半見掛於口唇當作實法會惟恐人不知我之長處我知差勝於人高懷我慢下視諸方至於陞堂臨衆如自鳴鐘不待叅扣胡說亂道不害恥羞嗟乎是輩又不止於招禍辱壞叢林而已

禪道佛法不獨古人有之今人亦有之要在各人苦心不苦心耳歷觀古人心性淳和識見深遠根器堅利爲人真實爲重法故尚有捨身斷臂底陸沉賤役底三十年不睡底八十歲行脚底如是種種心行不能備舉卽如世尊爲求法故觀三千大千世界乃至無有如芥子許非是菩薩捨身命處而况今之凡夫心性狂亂識見偏淺根器頑鈍立行不遠操心非實設或稍有一些資質底不但就不肯低頭行行不肯捨已從人不肯虚心請益不肯確志叅方又要穿好底喫好底用好底貪求無厭自家一毛也不捨拔乃至一人也未曾見禪道佛法從誰而得生死苦海憑何而超良可歎夫

明昧無二見是非在一心不肯者背明以投暗逐是非而轉流惟達道賢者了明亦非暗遂不被其所惑

如星之明月出則昏月固勝星日上則昧觀日之光輝更勝星月雲屯則晦如是三光照世於萬象中可謂最明者也尚不能無相傾凌滅之障人欲免賢不肖是非毀譽之譏豈可得乎惟太虛空三者明虛空未嘗明三者暗虛空未嘗暗何以故體非羣相而不拒彼諸相發揮識此則是非不能動其心毀譽莫能移其志何明昧之有耶

世間欲做好人者不須用許多奇特只是一味依老負實足矣凡所依人既老誠所行事既負責實雖學解不博言行粗淺歲月深久其好人之名不待求而自播矣設友不法之輩行非理之事縱能多聞強記巧語花詞賣淨嘴於人前欲求個好字猶如撥火尋冰恐終身難得也有能言行兼至聲實並真底則當今之古聖又不止於好字中列

參究一門乃是吾人了生脫死轉凡成聖最要緊底一件本分大事且如來爲發上乘心者說爲發最上乘心者說兄弟們有具最上乘根器底向父母未生前早已會得此事世尊猶在下風若具上乘根器底向一言之下瞥地無疑不妨與佛把臂並行其或根器稍中底一聞此事疑信兼懷此雖去佛不遠終恐

難見矣若是根器下劣底縱多聞而亦不信名之爲捨父逃走向外乞丐枉受貧窮之流逐日家偷工那夫向星火螢光下竊看些今人語錄強記些古德機緣廣學些口頭三昧做成個拴驢椿風擺柳底樣子以爲見人之招牌纔入叢林不辨高下就去說道說禪種種多事歇氣噴人聲色可惡嗟乎是輩真法門難除之巨病誠波旬眷屬再來也

從上佛祖千言萬語總是一語於一語中盡含一切於一切語究竟將來無非爲一大事因緣故經云唯此一事實餘二則非真兄弟們果能於日用中時時

刻刻將此一大事因緣頓在目前如銀牆鐵壁蘊於胸中似殺父冤仇於茶裏飯裏至睡夢裏也放他不過於法法上觀察法法上不着如鏡照像來無所粘過無踪跡虛受照應唯此能照能用不粘不染底一點仇恨未了只待時節而已時節一至徹底水消乃可與道相應工夫果實到此始信自心是佛心外無佛一切語言從我流出我亦本空不住空相任運騰騰縱橫無碍可謂大解脫場無事道人也其或未能一任熟翻三藏博究五宗咬文嚼字說相離言總不出流識分別作解依他名爲喫剩飯漢不知餓酸莫

撰述
大開祖師語卷三
十
向人前弄嘴

若論做工夫中底事無他第一最初入門寧可不遇人不可遇錯人寧可不用心不可用錯心若遇人錯受彼非法古謂雜毒入心殆不可救果遇作家宗師將胸中餘蘊盡向他傾心吐出隨彼洗滌陳習所授一法受於胸中如丁入木縱使千斤萬力也拔不出立志一定又要辦一個上好底常遠心盡其形壽切切做去一年不悟看一年十年不悟看十年何怕百年若不悟只如是看看來看去如生冤家總不見有身心世界盡十方虛空渾是一個生死冤家看克塞

諸佛鼻孔克塞祖師咽喉克塞人天眼目任他諸佛出氣不得任他祖師開口不得任他人天覷著不得工夫到此一半得力切忌不可停叅不可認悟更要就此提起精采從新做起向他開口不得處叅向他出氣不得處究向他覷著不得處看一看看到心思不能智照不及處卽此生死冤家亦無地安頓遇時遇節輕觸一下豁然迭落始見自心乾乾淨淨本有風光圓洞發明則一生叅學事畢乃可號令人天訶責佛祖可不負最初一念成有終始也
真實爲生死底人不必苦苦如蠹魚死鑽故紙縱鑽

出頭祇益生死與無生死了不相涉何故由汝無始
迷失本心妄認生滅爲不生滅稽習濃厚逐念流轉
及至於今未曾停息如今欲將無始生滅和盤拓轉
歸不生滅又去向紙上多尋方便更增生滅耳故圓
覺云末世衆生希望成道不務修行惟益多聞增長
我見不若固守一法最爲高上或念一菩薩名或專
一如來號或叅一話頭或持一經咒一發此心萬夫
難拔總不管他有利益無利益有靈驗沒靈驗出得
生死出不得生死捨着十年二十年至於一生不想
做人隱於深山草衣木食樹立岩棲汝只管磨煉去磨
到情塵消落一念純真時始知出生死法元不在紙
上紙上說底是出生死底路非是無生死雖一念子
未忘不妨於日用中更加精力單有這一念子從何
起是誰念看來看去心光洞圓此一念子當下水消
瓦解影跡無存方爲盡斷生死成無上道卻來回觀
生無生法猶如夢事但有言說都無實義
禪之一字孰不欲聞聞則通身潰爛若有一些好肉
卽是禪之不到處近觀諸方禪和子毒氣深入底如
春雨皮膚脫落底似冬雷大都是帶病傳方以症救
症斯不惟不瘥本病更增他疾耳

學者尋師訪友先具擇法正眼得不被人所惑然後親師則師無不真求友則友無不賢苟未具此目雖有志氣超古人智愚不分邪正不辨但以求法心勝錯亂聞名未免不被聲色流轉古謂打頭不遇作家到老還成骨董

本心老宿行年六旬自啖藥師經延壽索予開示迺書此示之壽命生於夙世道德辦於一生道德如水月壽命似漚光光非離月而生漚非水外而有漚之起滅延促無停水性不二光之明昧圓缺雖殊月體是一故知水月之本固同漚光之末自異耳人多棄

本逐末留起滅之漚光苟延歲月虛喪光陰道無聞於今後德非利於自他辜愒長庚於世無益何異天亡耶夫達本之士了漚光之不實念壽命之非堅一出頭來心無二事惟慮道之不成德之未辦工夫日倍於年溫寒不計時節一旦遂其所志斬新做人堪爲此生之明鑒後世之良軌縱使天亡於中何愧與諸喫生受飯處養老堂逐境隨流輩誠日劫相倍矣故先聖云壽命可天道德不可缺今古有壽德兼隆本末一致者若非寶掌出世卽彌陀再來復何疑佛制佛子不得妄語有四其最大者未得謂得未證

謂證故犯者波羅夷罪雖佛再出世亦不能懺悔故古之尊宿室中不妄許可以遵奉佛旨若此末法僧輩去佛日遠心行違縱勿論有識無識皆承上遺風稱善知識濫厠法庭匡徒領眾立序分寮往往向東堂云西堂今日有幾人省發向西堂云東堂今日有幾人啓悟彼此誑說雖曰互相激勵其瞞人昧已大妄語業難免矣惡聲遠播人皆厭聞非但不生信敬返起謗法之罪孰之過歟嗚呼今之善爲人師者深可爲誠能叅學者防此一着

僧問清淨本然云何忽生山河大地師云山河大地云何忽生清淨本然僧無語良久重請開示師云清淨本然卽汝心也山河大地亦汝心也皆非別物心生則山河大地隨處建立心滅則十方世界當處消殞生滅如幻殞立如泡二俱虛妄了不可得向這裏見透要會前話也不難

僧問古人道卽心卽佛是否師云是與不是門外之達這裏用不着僧云請示堂奧師咳嗽一聲僧罔測至夜請開示師云佛者覺也心卽覺之體也若自覺此心本來是佛名自利德復覺他心亦復如是名利他德併覺心佛衆生三無差別名圓覺德圓覺卽如

來分覺卽菩薩不覺卽凡夫若能一念迴光返照見
自本心佛之一字猶成剩語况自他乎

對客夜話未到這裏雲翻水動已到這裏風恬浪靜
擊碎淨餅空合空剔起眉毛鏡照鏡我以不言言君
將無聽聽竟夜盤桓松韻寒不落人間情與夢

小佛事

爲傳心臨庄主秉炬昔年受用今日不同今日受用
昔年不同昔年受用通身泥水今日受用滿面風光
絕承當處切忌承當好備辦時且須備辦花朝二月
雨淋頭脫下蓑衣圖自在雖然是忙裏偷閒要且知

大成必有大壞山僧今日助汝光明雲居峰頭柴不
用買便燒

爲內堂主秉炬拈火炬云千峰茆浪一溪水聲說法
不在簸舌搖唇截流豈假揮戈舞刃元字脚尚不存
何語言之有此是虔州人夫後消息向雲居竹竿頭
上據欵結案去也遂擲火炬云陽燄燒天影跡無空
花火裏翻觔斗

爲衍南大師設奠拈香云雙雙寒鴈同日南飛山高
海濶南北東西雲居雖與你同條生且不與你同條
死生也倚天長劍逼人寒死也鴈過長空連影去是

則相別多途猶記陳年面孔爐香清茗且無道話之
奇夜月流星獨唱還鄉之曲

爲紫竹林萬白大師封龕長水孤舟一月來未曾出
戶已安排全身送放千峰頂不向平常地上埋恭惟
竹林堂上萬公大師生前末後所爲因緣今向雲居
一毫端頭據欵結案去也大衆看看隨聲掩龕云鐵
壁銀山踪影絕木人夜聽石雞啼

起龕把住也千峰失色放行也萬樹增光一念不生
前後斷木馬嘶風入火場咄一咄云起

秉炬趲早未卽行只待雨淋首山中幸人多家齊

下手旋斫青柴帶葉柴燒得渾身都是口火風交吼
萬峰中一道聲光空外走

爲龍雲懷賢者宿秉炬舉炬云此能成物亦能壞物
成則地水火風當處發生壞則生老病死隨處滅盡
若是脚下無絲頂額具眼底總不向這裏棲泊且如
何是圓透一路攬炬云燎天熾燄休擬火撲地清香
莫認風

行脚垂示

途中值風雨風飄飄雨灑灑道人行脚好生涯草鞋
簪似白額虎拄杖活如赤斑蛇踏遍山水穿徹煙霞

去來不借他人力覓心無處卽爲家

聖水垂示雲居纔出不多遠心緒若干當下完惟剩
一身無罣碍不安閒處也安閒入是三昧一任鬧市
口展鉢盂深山頭卓拄杖白雲裏吹鐵笛紅塵中遇
知音布袋子灑灑落落阿呵呵不因今日事爭見昔
年心

佛誕日垂示因地一聲手忙脚亂曰天上天下惟吾
獨尊雪山六載水消瓦解曰一切衆生具有如來智
慧德相有底道自語相違有底道理合如是據山僧
判斷俱未抓着世尊養處何爲當年一段風流意入

山雖有出山無

畱別垂示道人以無住爲住住爲非住東拂于逮休
夏西瞿耶尼結冬南閻浮提垂手北鬱單越托鉢拄
杖子監窮橫徧總未動着一步臨濟大師道有一人
論却在途中未離家舍有一人離家舍不在途中阿
那個堪受人天供養師云行人飽坐人饑

安城垂示雲月峰頭不肯住卻來城市裏安身山僧
非是嗇熱鬧十字街前覓個人既到寶坊爭肯空過
拄杖子露頭露尾去也現前諸人切莫動着動着則
千斤萬兩直下要人擔荷大衆莫有承當底麼穿衣

喫飯人皆會那個男兒不丈夫

鳳潭垂示拄杖子在天非天在人非人混身三界內
一事也無獨露百草頭隨宜說法若以色見瞻卻汝
眼若以聲聞瞶卻汝耳苟能離聲離色不覩不聞內
守幽閒猶爲法塵分別影事諸人莫有過水不打濕
脚底麼看看

因齋垂示道人以三界爲居萬法爲侶一任拄杖子
從四大部洲踔跳上三十三天猶未是他鄉異域家
常飯應念托來福田衣隨緣遣去處處長安時時解
脫何親疎榮辱之有雖然點石化爲金玉易教人除
卻是非難

法雲誕日垂示山僧今歲滿五十判斷死生從此日
間家故具盡屬人惟畱拄杖是我底當風敵雨傲雪
凌霜隨分隨時自由自在雖然不得喚作拄杖子不
得不喚作拄杖子喚作拄杖子則依他作解不喚作
拄杖子則向外別求只饒會合將來一擊粉碎向淨
俛俛赤灑灑莫可把處見去猶是戰功未謝坐地封
侯要與從上佛祖酌恩報德未有分在况未到恁麼
地動爲聲色換卻耳目者乎諸人還知落處麼擲拄
杖云卽今休去便休去欲覓了時無了時

居士設齋請開示師云開示佛法人人本具開示世法個個俱能教中謂是法平等無有高下雖則平等本具叵奈日用而不知知而不信信而不行苟行而無恒志悠悠忽忽向半明半暗裏簸弄精覓轉弄轉遠美到三十日來終無個落處前路忙忙莫知所往嗟乎苦矣山僧自離雲居以遊化爲行直指爲心旣到寶坊忍不與人說破臨濟大師道赤肉團上有一無位真人在面門出入未証據者看看看之時要廻光返看聞之時要廻光返聞若逐前塵所起知見水牯牛全身落草去也不見道若以色見我以音聲求

我是人行邪道不能見如來居士肯向這裏見得徹信得及行得去敢道男兒不丈夫妻子聚首處祖師西來喫飯穿衣時諸佛出現家門卽是法門世法不異佛法龐公道有男不婚有女不嫁大家團圍頭共說無生話

龍雲中秋垂示秋風清秋月明山中受用不盡人間翫賞無窮行脚道人二俱不取不見道風頭來風頭打月頭來月頭打合頭來團圓打總不與麼來乾淨打何爲如此路逢劒客須呈劒不遇知音不與彈舉馬祖百丈海西堂藏南泉願同翫月次祖問正當恁

麼時如何堂云正好修行丈云正好供養泉乃拂袖
便行祖云經入藏禪歸海惟有普願獨超物外師云
馬祖父子恁麼說話大似振玉鐸應金聲雖則殊妙
奇特未免向光影裏奏泊山僧爲諸人頌出無端指
月問如何馬氏門中好事多供養修行拂袖去三千
里外辨滄訕

法雲制期垂示舉龐公道十方同聚會個個學無爲
此是選佛場心空及第歸選佛場今已開莫有心空
及第底麼有則出來選佛去也如無且聽山僧隨方
安頓東來底向西坐西來底向東坐南來底向北坐
北來底向南坐四維上下來底團圍坐總不與麼來
底中間坐諸人看看安也安得奇坐也坐得妙祇如
無爲法作麼生學過去心不可得現在心不可得未
來心不可得咄若只恁麼道也是開眼做夢

除歲垂示一年捱搭到今日今日方知是盡頭盡頭
依舊無落處卻悔從前不卽休若卽休暑往寒來閒
造化古今名相豈能留

歲旦垂示一年十二月月月有初一今古未曾移聖
凡不相識若相識羣陰剗盡一陽生九九還歸八十

一

像贊

思意佛

旋乎其髮皺乎其眉手攀其膝膝拄其鬚敷草而坐
逐日而思衆生本自無度佛法意欲何施誰知出世
丈夫也來賣弄愁癡

水月觀音

摘空中花撈水底月徒益狂勞應無所得何如念彼
觀音力甕裏斷乎不走驚

處山大士

觀音大士且聽我說如今盡大地人受苦罔竭刀兵
疾疫饑荒屢歲纏綿不絕叫苦聲震若雷汝耳爲何
不熱我今當面白過莫再這裏間歇

魚籃觀音

脚踏荷葉手提竹籃似魚非魚若賣不賣頻將此事
作繇頭逢人教出生死外

觀音大士

入流忘所所是何物忘所入流流向何處根塵本自
同源縛脫豈有兩路若悟識性虛妄狸奴也得成佛
又

聞不是根聲不是塵非幻成幻法自心取自心識得

圓通無背向頭頭物物盡全真

海舟觀音

滔滔苦海一孤舟
駕放風波浪裏遊
兩岸中間俱不任
度驢度馬度人牛

布袋和尚

這個憨布袋到處常見不在山門裏
便在佛殿外赤膊撩天嘻笑滿面
當來補處大慈尊
現住妙高兜率院

達磨大師

者位祖師尊嚴可觀
東土罕見其人
想從西域過來

剛鬚鐵面赤膽水肝
雄峰九載無人識
隻履西歸天

下傳

又

這胡僧真膽大一葦渡江焉
不怕上時容易下時難
只至如今成話櫛

又

何水無魚何天無月
直指單傳美巧成拙
雖然是主人若迷客
得其便我不從伊學
畫猫看你如何入虎穴

十六羅漢渡海

撰述
大高麗國高宗卷三
三十六個人畫底甚有神身上著五色脚底絕點塵
乘獅坐象跨虎騎龍遊戲於無邊大海不住彼不住
此不住中流安身於萬級洪波一任東一任西一任
浮沉看這夥不顧性命底狂漢大似天臺山裏五百
數中躲根阿師

長眉羅漢

齒缺生風眉長礙眼裸腹袒胸開心見膽

雪嶠大師

這老漢慣担怪賣風流逞機見初於徑山見你閉門
不納後於匡廬再叅轟雷掣電一條拄杖太無情逢

人盡教性命斷三十年來結生冤殃及兒孫沒了笑
沒了笑漢語胡言聞皆讚嘆

中興雲居諸緣和尚

道行孤高因緣廣博從北而來隨方而托一入雲居
全身放落轉寸土而爲金化狸奴而成佛受苦受辛
無言無說四十年來一向埋沒陳壇古廟冷香爐死
之更死今發活春山是處杜鵑啼萬紫千紅如血潑

傘居和尚

賢首圓通不分皮骨狹路相逢以毒攻毒吾之性命
喪師手中師之鼻孔落在我處將肯報肯以不耐不

多年冷帳熱似還謂是物兮謂非物咄舊容顏休錯
顧歷來千聖不能傳紙上無言真付囑

又

這阿師世所希少年窮快老莊癡人未到處汝能到
汝所知底人莫知去寬從窄將高就低面面清風生
杖錫團團明月照鬚眉只因深中臺山毒顛倒從來
無藥醫

又

稽首我師傘居和尚心特慈悲性多倔強生怕風吹
死喜水葬今由諸子不由師捧卻全身別供養萬仞

峰頭地大堅一輪明月當空放

騎牛像

老老大古古怪怪未還驢錢猶欠馬債白手騙頭
牛騎看你好看不好看

自贊

自幼單板到老倔強孤硬一生諸緣掃蕩眼空兮天
下獨行膽大兮佛祖不讓要識這漢姓氏名字陝府
任二哥雲居方和尚

又

偉乎其形異乎其像修乎其鬚寬乎其量坐兮如山

撰述
行兮若象不振而威不攝而望三十年來單提向上
只饒佛祖不容情逢人盡教性命喪

又

關西子沒頭腦畫出伊不恰好縱恰好也是虛空生
花草

又

七賢雲五老月亘古亘今光皎潔方融和尚本來面
只可瞻仰春夏秋冬難以分辨青黃赤白

歌

雲居四季歌

我愛春日居山逍遙方寸之間無縛無脫無忙閒或
坐或行或站祖道義天朗耀風光心地花開若將知
見強安排依舊漆桶不快

我愛夏日居山置身火裏栽蓮牛車駕出任人看觸
著焦頭爛面千丈雲開天目十方月皎松關失脚踢
殺佛如來別是一番境界

我愛秋日居山聖凡名相俱捐布袋收放碧雲巖萬
象森羅影現道悟機先言外心空馬腹驢胎孤光爍
爍古今閒觸著轟雷掣電

我愛冬日居山是中罷悟忘叅寒梅晚翠月堂前目

撰述
擊春魁獨占生死涅槃性淨菩提煩惱情乾饑來喫
飯倦來眠所作從前皆辦

四景歌

我愛山居春景新條嫩葉差參千紅萬紫及時開
倦鳥靈禽語怪明月遙呈清供香風謾把茶煎蒲團獨
坐白雲巖果是爲僧自在

我愛山居夏景翠苔岩洞幽哉清風面面送香來一
任開懷賞翫溪碧松花浪湧天空杲日光翻利名熱
惱不相關果是爲僧暢快

我愛山居秋景暘輝碧落瑤堦灣環卍字竹欄杆去

就松奇石恠照案清池月朗遶籬紫菊花開出時開
要入時看果是爲僧散淡

我愛山居冬景茆堂草榻虛玄梅花片片結成團懶
起開門賞見林下清貧可貴世間榮辱俱捐巍巍默
坐火無煙果是爲僧事辦

四威儀歌

山中行水綠峰青如畫成我常拽杖碧溪邊閒看白
雲似遠迎

山中住隨處雲深權當屋橫來豎去一個人徹頭徹
尾無葢覆

山中坐本無衆生誰成佛赤條條的一閒身更從何處安頭角

山中臥一張床上無兩個日在月來晝夜忙鼻息如雷正睡着

十二時歌

夜半子打坐工夫暫且止兩脚長伸抱佛眠鼻息如雷穿被底枕邊事難盡舉睡醒方纔跌坐起佛夢法夢兩皆空面目從來只如此

雞鳴丑百鳥林中亂開口鳳凰山上解翻身那怕羣毛膽似斗丈夫漢無別有獨具一雙超方手蓋天蓋

地沒遮欄豈肯隨人摸壁走

平旦寅紅日熙熙到我門百年暗室一光破寤寐方知無二人泯爾我滅疎親纖毫顧慮則非真一念無生只這是佛法人情過隙塵

日出卯家常茶飯無粗好一飽高吟百慮忘那有閒心惹煩惱今朝事明難保何若從頭一齊掃雖然不是大修行亦可討些小便饒

食時辰鹽醬何曾挂口唇去歲喫食油炒菜至今想起舌生津寧自苦懶求人借錢終不濟家貧但願明年緣分好粥飯禪和不離門

禺中已出家衲僧最伶俐打頭截斷老婆舌從茲不
惹波羅密張家三李家四一任說來不動氣非是生
成心量寬學得自然無師智

日正午是誰錯打三更鼓只畝戲美耍孩兒不顧老
誠人作主日可父月可母黑白誰能分清楚最先一
着更難明鹽價從來無定估

時昧未青天白日着鬼魅十字街前占卦靈說我今
年多好睡義不通禪不會開口便把人得罪只因當
面不容情過後惹得人指背

晡時申目前物色自來貧和雲置得封口衲家常無

復問寒溫放一件穿一身幾番過夏又經春多年要
作單板漢難道今時又望人

日落酉明眼人前謾開口荒村破店水云深野鬼閒
神難措手衲衣下何所有到家自會知分割趕起泥
牛海底眠聲盡作獅子吼

黃昏戍燈盞無油黑似漆雲開天上月孤圓一線清
光穿屋壁曲木床簾草席老鼠做家聲唧唧一心只
想死貓頭誰知省事返多事

人定亥從朝至暮事已辦今宵脫腳且安眠明早起
頭再打筭過去心未來念現在誰續復誰斷百年三

萬六千日返覆無非是這漢

插禾示衆

雲滿青山月滿溪歌聲浩浩插禾時卽此薦莫狐疑
雲農口裏絕浮詞泥水田中親下手淺深冷煖自然
知

身心放下無多事一莖拈起有來由泥沒脛雨淋頭
縱橫簑笠在春疇除卻種田博飯喫更無佛法可傳
流

佛祖傳來真切意良疇一味植靈苗須努力莫辭勞
一年一度甚難遭全身放在此田裏那怕泥深水面

高

雲居佛法異諸方博飯耕田歲日長忘苦樂任閒忙
水泥深處建禪堂露地白牛生拽轉逼得犁頭鐵放
光

入鄜四儀

我嘗城市經行隨時任運騰騰無論晴雨不拘風要
動乘輿便動畫閣雕樓物色花街柳巷歌聲見聞出
入甚分明一點不落凡聖

我嘗城市建立處處銀山鐵壁本無古往及今來有
甚安居解制大方家非彼此長安路絕蹤跡行脚寸

步未曾移歷盡十方三世
 我嘗城市打坐放下蒲團一箇杳梁豎起事無多聖
 解凡情盡破究竟空非有外歸源水外無波一毛頭
 上立山河有甚階級可墮
 我嘗城市鼯眠兩丸晝夜循環紅輪瞬息上三竿尚
 未翻身轉面枕邊嘗作佛事夢中永絕攀緣任從車
 馬到來參也着別時相見

偈

贈蒲菴大師事親

既已辭親又事親是中端的有元因兩條檐子一肩

荷要作世間出世人

送其天大師住壽昌

破暑登舟為祖庭風帆未挂浪先生如龍拄杖入山
 去震動乾坤大好聲

懷天童密和尚

昔日曾參金粟寺入門水火不相投偶臨白棒搥毒
 鼓觸着生前徹底休
 問處幽深苔處高棒頭有眼已曾遭此心莫道無踪
 跡直至如今恨未消

參無念和尚

孤筇萬里向南方只道叅禪別有長黃檗峰頭逢念
老頻將打罵作商量

叅雪嶠大師

海上歸來入徑山語風深處扣僧關相逢不許人多
話惟道叅禪不等閒

付檀園林維那

江邊不駕打魚舟深入洪波下直鈎釣得一鱗頭尾
正聯芳千古足風流

贈洞山續公徧叅

柳樑橫肩無住身萬峰直入欲誰親明知佛法無多

子要向諸方問過人

贈惟六座主

面面銀墻面面門真人出入獨稱尊放光雖不離身
宅迥脫三心與六根

送達公禪師出山

數載清涼仰道風孤高不被世牢籠如今拄杖出山
去莫落人家壘甕中

付遺聞德監寺

恩怨門深不易遭自從無始至今朝相逢狹處難迴
避徹底掀翻沒一毫

示圓明淨侍者

禪人相伴我居山一日曾無半刻閒不是搬柴便運水更令托鉢到人間

示一知客

本山菓子本林茶菓熟茶新味可嘉托出滿盤隨客用清香切莫自先誇

示刻募老宿

年老爲僧事未遲朝聞此道夕無疑旣將身入空門裏喫飯穿衣更是誰

示本悟禪人

佛在已躬莫外求行同道路渡同舟他山此水雲兼月處處蹋穿始徹頭

示憇巖密維那住山

一句投機百計休惟將此事遯林丘草衣木食深藏蓄水到渠成始出頭

示明宗禪人

未久居山又出山草鞋踏破路頭寬旣爲出世奇男子豈把光陰過等閒

示見初發監收血書法華經

刺血書經事最真單提一念頓忘身法輪轉處龜毛

赤流布十方絕點塵

示定之禪人

工夫做到契緊處心境起時當下完若作從前如是見得驢容易脫驢難

示不思禪人

禪人乍學做工夫且看趙州狗子無但有言傳非是意一聲爆地自相如

畱別劉調元居士

浩浩乾坤遊戲場那分此界與他方和光混俗隨緣去焰熱水寒總不妨

示休心靜主徧叅

道在家山莫外求全身放下便無憂若將玄妙心頭挂叅到驢年未卽休

示源侍者

分明此事莫多疑喚去呼來亦大奇不信但從日用看迴頭轉腦是阿誰

示可靜主

毫釐錯念隔天涯辨的除非是作家莫道靈雲獨具眼春來誰不見桃花

示懶緣靜主

飯來便喫茶來飲飽後經行倦打眠除此別無一件事寒溫幾度不知年

留別馬巷眾居士

拈來大地一禪堂坐臥經行任抑揚識得目前無礙境何分東土與西方

示本禪人叅父母未生前面目

父母未生誰是我已生之後我為誰兩關透過知如此高坐禪床罵祖師

示雲上禪人

乍得身心一念間更須努力莫停叅若從此處端然

坐無事深坑出大難

示守真禪士

學人叅學莫虛勞壁立千峰着眼高知識門庭如火宅擬心湊泊被先燒

示無入燈公

叅禪縱得入頭處更向孤峰徹底寒不具一番堅固志荷擔此段事應難

示自立行者叅學

記取當年下髮時病軀難以教癡兒於今打發諸方去學得成人不可知

示葉居士祝髮

看破名高與利高千金難買剃頭刀若從刀下明斯
旨無始輪迴一念消

示瑞卿葉居士

五老峰高遠望尊難將寄語問寒溫自須親到一回
後別有風光照面門

示澹然饒居士

澹然無事是家常靜裏工夫莫暫忘若執清閒為所
得百年光景一朝霜

行實

自紀

予籍陝西西安府涇陽縣任姓子生於明萬曆三十
年壬寅七月七日子時年五歲識世間善惡事每見
僕輩烹割則避走見僧入門則喜笑或與父語話必
拱立敬聽不好共羣童戲愛靜坐非母喚則不動一
日子兄特具雞黍強命予食不覺怦然有動力請母
止之由是隨母素食見母禮佛亦隨禮見母誦經或
跪於前或立於側母口授心經須臾成誦不忘年十
歲有姻家欲為謀婚定者父謝之曰此兒當為佛家
弟子非塵俗可羈人或徵其意父曰吾邑有寺曰赫

增主事僧名海福持身頗嚴見人則笑人以笑和尚稱之素與吾爲齋會友年七旬餘染寒疾吾日往看訊福曰老僧不久離此居士可施我安身處否吾曰寒家山地頗多任師所擇卽用供養福合掌謝布施次夜吾內夢福入房忽醒以告吾驚異往視福已亡矣旣而吾內有身茹葷則嘔吐遂發心長素供觀音大士像習金剛般若持誦無間吾時心占前夢知福所爲非山地矣及媿得男有族祖封君年九旬餘至吾家問兒生日時詳其語乃安名福生年二歲見僧則笑三歲見佛像則合掌五歲兄與腥食則不憚今

十歲雖姑嫂姊妹之房輒未嘗過如成人儻此兒善根夙植故當成就之恐墮落世緣或有他患父往往告人如此故予出家之志彌決也年十二父喪兄欲爲予議婚母不許曰汝父存日作何言而汝欲違之邪况我亦有捨子之念但未得好師耳自此兄弟姊妹皆以僧相看特加恭待年十六辭母隨族叔謁五臺母曰我聞臺山有萬尊肉身菩薩常住處汝去必得好師勉之勉之遂贈飾金爲供儀次晨拜行親族男女兄弟姊妹無不悲淚惟母不欲以離別之色傷予宿志更歡喜見送夏初到山見其林巒聳秀溪徑

幽邃舉足皆寺啓眼是僧問叔曰母謂此山是肉身菩薩所住處何者卽是叔曰龍蛇混雜聖凡難辨又曰我爲出家當依何人叔曰隨子之緣經兩月五臺高頂諸大名刹無不徧遊一日過寶林隨喜主者一見如故交欸畱連日入續燈堂見大材和尚叔禮拜予亦隨拜師日向夢老者携童子求披剃今其拜者大似前夢所見叔告之情師卽肯許以七月七日設齋集衆親爲剃落受沙彌十戒法名如璽是爲萬曆四十五年丁巳歲也自是每歲奉命往還京師聽講靡間年十九師壽九旬有二一日忽示疾絕飲食三

日予跪請曰璽早年喪父辭母出家雖蒙師慈悲剃度心地未明師若不起璽當作何事卽得不負爲僧之志師曰堅持淨戒爲本聽學大乘經律開發慧性若有向上根器當依善知識叅禪去須知老僧曾見一峰來予曰沙彌十戒已蒙師授教典雖未精通然略已講究但未知甚麼是禪師瞪目一喝而逝椅坐三日龕供七日顏貌如生封龕日有彩雲籠寺諸山耆宿晝夜接踵者半月餘茶毘日烟氣異香開壙造塋禮謝諸山一載方訖年二十歸鄉看母母已有疾日夜侍其左右母曰我持齋多載病在呼吸子旣爲

僧若能爲母下髮是爲至孝予廼奉命啓佛爲母剃落朗誦三皈十戒母聞而歡喜索鏡自照曰素狀女身今現僧像我願足矣斂鏡端坐念佛而逝侍柩三月日誦金剛般若安厝方畢是歲秋卽結友謁峨嵋聞放光臺有活普賢直詣叅見纔禮拜師曰普賢普賢予曰何得如是虛妄授記師曰老僧何敢輕汝是夜茶次問曰何省人予曰陝西師曰離鄉來此端爲何事予曰謁名山師曰山以何名予曰普賢道場師曰道場已入還見普賢麼予曰名不虛傳師曰你去南方叅得禪予曰此間還有禪也無師震聲一喝予

於是領略其旨密契先師一喝之意年二十一謁于佛寶頂秋入楚之荆黃時漢陽水荒百姓避走者如蟻聞卽襄頗熟而反棹冬謁武當度歲年二十二仍轉襄州聞黃檗山無念和尚道風大振門庭峻異凡見人來以打罵爲佛事徑往叅見纔入門師喚厨司云有飯盛些來與這間神野鬼喫了去予曰早知和尚有此扁額師曰油嘴花子叫執事快與我扞出去予曰將頭不猛累及兵丁師拈拄杖便趲打予急走曰拄杖子請和尚自領去執事曰莫多嘴予曰早恁麼道免勞和尚尊力挂搭三月一日辭行師曰再住

撰流
力能而師言卷三
住予曰來時遣卽不去去時留卽不住師拈拄杖歸
方丈予便戴笠而出秋到博山叅見罷安單雜務寮
冬入禪堂結制開發生從何來死從何去話予曰生
死緣起且不問未審是甚麼物恁麼來去師曰正好
疑著力叅一季未有人處每入室請益不契遍撥成
病移單印定寮調養忽聞同寮僧讀楞嚴經云因緣
和合虛妄有生因緣別離虛妄名滅殊不能知生滅
去來本如來藏常住妙明不動周圓妙真如性性真
常中求於去來迷悟生歿了無所得如藥病相投舉
體輕快遂入室呈偈請益偈曰生從何來歿從何去

但有言說都無實義師曰未嘗無實義只汝不會予
曰某甲從來無虛語師曰未是由是疑情更發以至
竟夜不寐終朝無語雖同衆作務如無一人相似不
知者竊以古頭中漢譏笑之予或聞亦不知也一日
隨衆出坡挑米因途中擔折如夢忽醒心目洞徹歸
請方丈請益師止靜簾外作禮而退年二十四春過
匡山訪一菴慧燈法幢諸尊宿輩夏到金粟叅密雲
和尚一見便問臨濟大師道有一人論却在途中未
離家舍有一人離家舍不在途中意旨如何師打曰
一棒齊打殺予曰此是殺人棒如何是活人棒師又

打曰還知痛癢麼予曰殺活分明今且置全提正令當復何如師又打予曰元來金粟佛法無多般師曰你作麼生會予一喝便出秋過南海冬轉徑山復往雲棲度歲次春入天台國清訪寒山拾得遺跡復叅湛然和尚聽講數日凡浙地名山巨刹隱顯高賢靡不徧叅請益也年二十七夏復入徑山叅雪嶠大師纔見便曰我這裏沒飯與你喫到常住去予曰已蒙常住挂單茶飯俱足敬來求師太名筆師云帶得紙來麼予曰恐不中尊意師曰拿來看予展兩手師云也將就予便撫掌而出秋到金陵冬入講席次春隨

喜諸大名刹徧訪京師年二十九謁九華從江西欲往曹溪道經西昌值子房曾公畱掩關三載詳覽教典年三十二受虔州坦公請講楞嚴於蓮社禪林夏講孝衡疏鈔明年復赴前請重講經鈔又明年受蘇溪冠山請講孝衡彌陀等鈔年三十五丙子春乃值先老人顓愚和尚自螺川過五雲首龍郭公及衆信迎師至蘇溪休夏於百桂書園時予主香象期敬詣叅見作禮問如何是諸佛戒師曰公去問善知識予曰和尚何得過謙師曰病僧行腳日久予曰也要在此爲此師笑曰公且坐喫茶遂將求戒顛末詳細告

撰述
師師應諾於五月二十五日增沙彌戒六月初一日
進比丘戒初六日圓菩薩戒三壇具足感慨希逢更
益精嚴遂發結茅孤峰之願丁丑春師往匡廬埽憨
大師塋秋入雲居予聞卽請親觀師時受給諫熊青
嶼公與味白師請興復雲居命予職監院事每見師
教人叅觀音大士卽今在甚麼處話一日解制大雪
連降師命衆作頌允諄諭予作復垂問勘之予頌曰
多言人怪寡言癡語默何嘗不是伊若問觀音真住
處梅花幾點洩天機師云洩甚麼天機予曰瑞雪報
年豐師曰再頌又曰識得這些便休歇甕裏斲乎不

走驚問今何處是觀音梨花偏打元宵節師云你喚
甚麼是甕裏驚予一喝師曰此皆住山得的予曰元
來不欠少師曰你真鬼怪予曰某甲見和尚如古佛
師默然予纔出方丈師又呼入云觀音大士卽今在
甚麼處予曰家家門前雪滿堆師曰雪消後如何予
曰水到渠成師曰不辜負你喫清粥淡菜予卽掩耳
而出時庚辰孟春望日年三十九歲矣辛巳春謝監
院事欲結靜廬於山之後屢懇師固不諾秋迺有南
嶽之行欲畢結茅之願途中師復遣人趕回癸未秋
七月十一日師榜示大眾安第一座予入方丈堅辭

師曰此是閒執事八月初三日師出山往邵陽初十日合院大眾請理常住事辭之十八日護法熊季納居士復入山設齋同衆固請十月初七日師自吉安遣人賫書至山命衆奉予代理院事堅辭不獲十五日結制復請落堂有法語臈月八日秉命傳戒有榜式并具別錄是冬師阻兵寇不達遂返棹抵金陵甲申春予走金陵迎師還山而師建紫竹林乙酉再迎又以林事未訖期以明春丙戌因諸山多事予未遂前約迺招法璽大師賫書往迎師已登舟疾作諸弟子強舁歸林以五月六日跌坐而逝二十九日訃到

雲居予卽買舟往迎師龕歸塢而林中畱龕供養相待久之請天界先和尚處分以明秋爲歸龕之定期予於時負病還山蒙熊氏一門暨合邑紳衿居士諸山耆宿公請予繼雲居之虛席辭再三不已仍以代理就事俟師龕歸塢然後赴諸公命丁亥夏躬往迎龕值師初忌衆請天界和尚上堂予問青青翠竹盡是真如鬱鬱黃花無非佛性只如竹未生花未發真性何在師云當今突出別手眼看取威音那畔機予曰當今眼卽不問如何是那畔機師良久云會麼予曰深密幽玄蒙師直示向上一路千聖不傳意旨

如何師云這段風光天然自在予曰恁麼則彌輝普耀去也師擊如意予便歸位一日碧峰寺見師師問何處來予曰林中來師曰林中事動止如何予曰特來請問和尚師云提起放下一任繇你予曰也要和尚證明師云杖人從來不輕許人予曰設許人時如何師良久默然予便禮拜師亦默然午後入室禮拜師云作甚麼予曰歸林去師云適從那裏來予曰隨喜羅漢來師云羅漢都在麼予曰若不在將甚麼見和尚師云杖人無面目你向何處著眼予曰轉見親切師云如何是你親切處予便禮拜而出林中事畢

過天界辭謝師云向日彌普底今朝試道看予曰總在這裏面辭去師云水遠山高切須仔細予曰自有拄杖通霄徹淵便出師送偈扇如意等具力勉受之冬初抵雲居時山田遭蝗所須百不給拈据逾年以巳丑仲冬廿一日之吉宰堵甫成院舍香燈略具所不能莊嚴如意者以待將來同門諸兄之緣力耳事竣予告護法檀越及在座諸師面請法大師繼主先和尚之席法已慨諾季冬廿四日予將常住冊籍什物付執事看管以俟奉法入院而予將退居堦院侍香燈法廼約期去匡山而不時至而予延竚竟載坐

撰述一
才高而節高卷三
四三
違夙願紆懷成病辛卯春遂出山托鉢行脚夏至匡
廬卜隱未就秋挂錫五乳冬爲諸子說戒時年滿五
十矣壬辰春本山耆宿見契始泊於五老峰之瑞雲
崖須穴同居野蔬度日而又有千尋之嶂結秀層雲
萬頃之湖俯瞰無際凡予二十年間積懷未遂者至
此而可以無憾矣予自辛卯辭雲居事退隱匡廬春
秋九易承先師浪老和尚屢書勉其應世皆以老病
不出山之願謝之己亥五月朔二日師差風峻機持
書到山有衣偈源流囑予予卽焚香啓讀竟對使舉
示左右云遯跡匡廬數載一切是非不啻縱有口舌

撩天到此水消瓦解卽今三世諸佛衣法歷代祖師
源流我本無心希求彼却有意自至且道受卽是不
受卽是乃擲書於案頭云老賊分贓獲者殃及九月
朔七日見日公送訃音到山次日設位上供拈香云
璽於數年前跨木馬遊火宅眼冷心灰數年後向孤
峰結茅屋大休大歇已謂此生事畢豈知禍身難掩
欲隱彌露往業難逃欲避偏遭只得重抖精神復整
威儀拈一瓣香穿渠鼻孔說幾句話通渠耳竅雖然
賊過張弓要且箭箭中的呀將昔冤報昔冤以今屈
酬今屈莫道對頭不相識十一月朔二日出山膺月

朔二日抵天界初八日對龕上供告香云千里聞風
一月來遙知此事已安排全身坐在炭坑裏向外覓
求焉在哉庚子四月十三日送師龕入攝山建捨八
月十九日於紫竹林受侍御陳旻昭居士憲副劉純
之居士暨合郡縉紳孝廉文學居士同諸山耆宿本
寺方丈監院等請住天界於九月十五日入院辛丑
春結制皆有法語載錄夏建普福道場七晝夜時子
年滿六十矣是夜茶次因衆問予有生以來行實不
覺惘惘至是侍僧次日請錄遂援筆記其大畧如此
三卷終

菩薩戒弟子劉興孝捐資敬刊

和中峰禪師懷淨土詩

廬山瑞雲沙門大璽著

一乘願力入娑婆忘失西方劫數多今日迴心須念
佛去來由自由他
故鄉非外路非賒纔想歸家便到家眼裏西方心內
佛迴光返照本無遮
欲往西方須念佛六時晝夜莫停聲情塵念到消忘
處淨土何愁不得生
國名極樂誰爲主祇有彌陀一世尊垂手娑婆無量
劫教人同入念佛門

信行弘深願往生西方三聖總持名慈悲不捨哀攝
授我命臨終共接迎
念句彌陀問是誰問來問去起深疑渠元就是唯心
佛要與當人自證知
彌陀釋氏共胞胎兩土平分任取裁識得自心無不
是此誰生去彼何來
此去西方多少路迢迢十萬億途程端持自性彌陀
佛淨土惟心絕點塵
諸佛本無彼此相眾生與佛自疎親蓮花世界何多
佛盡是娑婆過去人

死死生生死死塵塵剎剎塵塵自從一念彌陀
佛頓脫輪迴無始因
歎不歎兮癡不癡無心念佛似嬰兒全身本是光明
藏悟後還同未悟時
淨土娑婆共一家教人生去本無差若將彼此心求
佛捨却阿娘認着爺
苦海無邊欲出離只須日夜念阿彌一聲相應狂心
歇便是舟登彼岸時
卽心是佛將心念念到心空佛亦忘親證一回方解
道涅槃生死總無妨

佛祖同宣淨與禪隨機方便利人天箇中消息無分別直指歸真達本淵
佛說彌陀一卷經全彰依正數難明自須親覩慈尊面始信剎塵是化城
淨土云何名極樂因無惡道苦相侵珍衣寶饌隨心至樓閣園林地布金
樓閣層層寶所成門窻咸放大光明黃金座上彌陀佛說法時時度衆生
七重行樹葉婆娑四道金欄界網羅晝夜經行花滿地香風微動念彌陀

九品蓮花共一池含輝發耀映時時常爲不退菩薩母產育娑婆念佛兒
珠網玲瓏寶樹森微風吹動妙多音譬如天樂同時奏聞者皆生念佛心
八德池中九品花或開或合大如車青黃赤白光交燦底布金沙長佛芽
地布純金平似掌六時不斷雨天花衆生清旦盛衣裓供養他方佛老爺
鸚鵡頻伽遶樹林梵聲和雅悅人心休疑異類同居此盡是彌陀變化音

彌陀一念一蓮華因徹珍池果不差念到功成佛接
引一聲彈指便歸家
一心不亂是專持名號聲聲莫暫離打破疑團卽是
佛不須重覓古阿彌
萬德洪名無量光十方普照貌堂堂自從無始至今
日劫數何如壽數長
洪名一舉萬緣灰獨露娘生面本來非色非空非背
向更從何處惹塵埃
欲尋捷徑歸家去惟有叅禪念佛門除斯別求方便
路更無超過此爲尊

叅禪不外唯心土念佛何殊直指禪禪淨同源入處
異任伊先上那邊船
彌陀卽性性唯心生與無生絕點塵內外不居中不
住露堂堂地一閒身
成就黃金丈六身圓光普照日惟新人天聞見生希
慕同種當來出世因
六方諸佛讚西方彌覆三千舌廣長異口同宣唯極
樂更無別處可商量
遙憶西方西復西極西之處更難思但將妄想心消
滅卽是歸家見佛時

十六觀門門廣大四十八願願洪深知先發願生彼
國守約尋門歸自心
萬慮咸休坐草堂一心不亂想西方有時忽入那伽
定親觀彌陀無量光
願見西方佛世尊時時送想日頭昏彌陀知我歸心
切返放毫光灌頂門
不立一塵修淨土還空萬象念彌陀纖毫着意尚非
是何况心中妄想多
一盞清燈一炷煙光明常照於龕前殷勤念禮彌陀
佛徹骨冰寒尚未眠

自性彌陀莫外尋外尋空費草鞋金迴光返照能尋
底不出當人一點心
脚踏今世門頭地頂放威音那畔光究竟此心元洞
徹七通八達有何妨
事窮理極獨惟心妄想浮塵不敢侵識得此心無寸
土拈來瓦礫盡黃金
眉毛豎起眼橫睜念一聲兮問一聲千聖至斯無覓
處箇中誰敢強安名
威音那畔絕消息今世門中覓亦無妙有真空常湛
寂彌陀卽是古毘盧

六根六識六塵情內外中分界處生無位真人都不住頭頭法法放光明
視也無形呼有聲有無呼視甚分明及乎尋箇分明肯却被空花翳眼睛
案頭常煉般若炬爐內頻燃解脫香一句了然超百億寂光三昧徧十方
往生捷徑在人心切莫徒勞向外尋辦自肯心念自佛本無差別路頭侵
萬象之中獨露身遠無疎濶近無親現今若要知端的但向塵中作主人

六根都攝念彌陀淨土唯嫌揀擇多深入一門一切入百千方便盡包羅
六根恰似劫財賊六識猶如引盜郎縱有心王無用處彌陀一舉盡投降
我與彌陀夙有緣彌陀爲我用心堅嬰兒憶母情親切母念嬰兒最可憐
念佛念到最親切寒暑飢虛總不知只待因緣時節至彌陀一見更無疑
佛法本無權與實衆生根器有聰愚彌陀化主心平等同指西方一路途

彌陀爲甚皺雙眉堪嘆人生大似癡面赤髮烏不念
佛齒黃頭白悔應遲
萬行莊嚴清淨土圓滿福慧紫金身衆生非是全無
分只要居塵不染塵
三界無安如火宅四生輪轉認爲家彌陀苦口與人
說勸往西方九品花
信力堅強行願真往生因果不虛陳若能念念心無
退卽是蓮花國裏人
無量劫來生死業彌陀一念盡蠲除命終還仗洪名
力上品蓮臺定可圖

八萬四千入道路箇中捷近是何門十方三世佛同
贊淨土彌陀第一尊
清旦鐘聲法喜時盈堂僧衆念阿彌鉢盂應量一般
飽但往西方有速遲
年來想念佛心堅聖境時時現目前昨夜繩床一夢
覺全身猶在寶池蓮
一心不亂那伽定名號專持般若禪寂照圓融真淨
土十方世界亦如然
晝夜彌陀十萬聲也無欠少也無零是中有箇難瞞
底字句分明計得清

彌陀佛是我親爺棄捨於孀去路賒三十餘年空眷
戀至今發念要歸家
自家屋裏彌陀佛日夜何嘗須臾離若去將心向外
覓世人豈不太愚癡
喝棒如雷氣似王問渠着甚急顛狂自心不把彌陀
念只恐臨終手脚忙
佛是衆生慈父母叮嚀苦勸早歸家莫教兩鬢生霜
雪擬欲還時路恐差
勸念彌陀不得閒將心日用苦攀緣滿堂金玉雖爲
貴難保人生有百年

功名蓋世日無多覷破猶同水上波話到無常空嘆
息何如趑早念彌陀
人生富貴植前因布施齋僧發意真若肯今生思念
佛當來又是果中人
貧窮念佛正相當跣足提巾上藕航若問歸帆何太
急因無財寶挂心腸
既作人間大丈夫莫將財色把身誅阿彌陀佛隨心
念托寶蓮胎應不無
女流念佛信繁難忙裏偷閒要數完若想臨終生淨
土莫愁家富與家寒

無盡
鉗鎚拈起响叮噹打鐵爐中選佛場久煉純鋼成一
片功成時至往西方
鸚鵡舌巧被人籠念佛無心却有功脫下皮毛生淨
土靈明托化藕花中
十善咸明感上天不持名號總徒然縱能修到非非
想難比西方下品蓮
人人盡道念彌陀借問彌陀是甚麼眼似銅鈴心似
漆口吧吧地只圖多
娑婆五濁未能清諦念彌陀願往生感應道交佛接
引剎那間悉頓圓成

庶鳥珍禽同念佛茅堂寶閣共爲家若將清濁分優
劣平等光中見自差
百千方便皆權說唯有念佛一事真但看古今賢與
聖阿誰不把此門陳
因該果海膠中漆果徹因源錦上花流水光中知念
佛名陽影裏解歸家
廣陳依正從今日備載修行利後人舉約該餘成捷
徑去繁崇簡早歸真
想相爲塵垢是情出塵雖淨垢還生要將漆器掀翻
底但念彌陀六字名

應無所住安心竟心若有生所住非降伏其心唯念
佛西方淨土是真歸
一身四大爲墻壁五蘊三毒當作家圓洞六根皆尸
牖心佛出入總無遮
芭蕉好似世人心剥盡方知惜寸陰若肯從前思念
佛且無霜雪把頭侵
千林花鳥音和雅萬壑松濤聲韻佳無限風光無限
意念佛念法念僧伽
魔強法弱路千差一念無爲似斬麻坐斷兩頭生淨
土念佛還仗佛真加

自心有病自心醫病差醫忘心亦離若問此方真妙
訣阿彌陀佛是吾師
蓮池海會佛如來勢至觀音坐寶臺垂手娑婆同接
引衆生箇箇離塵埃
想見西方九品蓮至誠歸命禮金仙道交感應忘能
所心地花開現佛前
蜂房蟻穴光明藏柳巷花街功德林法界等觀皆淨
土原來無處不惟心
說是說非人不解譚玄談妙有誰知依稀彷彿難分
辨一舉彌陀盡決疑

既念彌陀願往生休疑心地難明觀音勢至爲朋
友佛道何愁不速成
萬樹春風入院溫寒涼消盡熱心存花香水暖蓮臺
淨直往西方面世尊
夏日炎炎似火流陽光燒白世人頭彌陀常住清涼
國接引衆生向彼遊
一念彌陀萬事休長空雁過語悲秋歸心恰似離弦
箭端向西峰看日頭
冬至風寒雨雪飛飄零稚子欲誰依婆心切切倚門
望牖盡年窮不見歸

四時八節如旋火萬死千生若轉輪只有此心無動
靜端持名號日惟新
西方風景最清涼心地無塵熱惱忘諸上善人同會
處經行坐臥悉安詳
卽是卽非還更遠離名離相處猶疑多方善誘都難
信親見歸來始得知
茶烟消盡五更初除想西方一事無鐘鼓聲傳空劫
外一門深入法王都
勿論寬兮勿論親逢人一味語頰頰口空非是說空
話勸念彌陀果是真

自從親入遠公社善友難逢是箇中不遇中峰懷淨
土青山逾遠雲彌豐
最上叅禪惟念佛祖師公案漫疑猜不須待悟拈花
者且仗彌陀歸去來
或曰西方或謂禪聖凡沙界總同圓舌頭非是無觔
骨遍覆三千出自然
詩成百八口親宣雖讚西方不礙禪識得自心無定
法但隨機便利人天

菩薩戒弟子劉興孝捐資敬刊



入四十終
此中六冊不足

樂書

大正...

